

# ESTERI

---

Teksti original: Beatrice Hollenbeck  
Përshtatur për Evropë nga: Jennifer Haaijer  
Perkthue: Ana Memi, Leonard e Enkeleida Doka

JU LUTEMI VINI RE!

Vizualet për këtë seri mund të blihen në pjesën më të madhe të zyrave të BUF-it dhe në dyqanet në internet. Për një listë të zyrave të BUF-it dhe dyqaneve në internet në Evropë, ju lutemi vizitoni [www.teachkids.eu/al](http://www.teachkids.eu/al) dhe kliko mbi “Vendet”.

**Bashkësia e Ungjillëzimit e Fëmijëve**  
**Kutia Postare 249**  
**Durrës**  
**Albania**



**BUFESH**  
BASHKËSIA E UNGJILLIZIMIT  
TË FËMIJËVE E SHQIPËRISË\*

Copyright © 1964, 1987 Child Evangelism Fellowship® Inc.  
Të gjitha të drejtat e rezervuara. Përdorur me leje.  
Mund të riprodhohet vetëm për përdorim personal, shërbese,  
jofitimprurës ose jo-komercial. Vizitoni [www.teachkids.eu/al](http://www.teachkids.eu/al)  
për më shumë detaje mbi lejen e përdorimit.

## **Shtojcë e Manualit të Mësimin biblik rreth Esterit**

Mësimet 2 dhe 3 janë për fëmijët e krishterë. Sidoqoftë, nuk duhet të harroni që të ungjillizoni fëmijët e pashpëtuar në grupin tuaj. Për ta bërë këtë ju sugjerojmë të përfshini këngë ungjillore në programin tuaj dhe t'ua mësoni ato fëmijëve në mënyrën e përvijuar më poshtë.

Para se të paraqitni Mësimin 2, mësoni këngën "Lajmi i Mirë". Ndoshta, babai juaj lexon gazetën çdo ditë. Shpesh lajmet janë të këqija - një aeroplan rrëzohet, një luftë shpërthen apo skuadra e tij e zemrës në futboll ka humbur ndeshjen. Sot ne do të këndojmë një lajm të mirë, ndoshta lajmin më të mirë që keni dëgjuar ndonjëherë. (Këndoni këngën).

Lajmi i mirë! - Krishti ka vdekur për mua! Jezus Krishti Biri i vetëm i Perëndisë, na donte kaq shumë sa vdiq për mëkatet tona. Perëndia duhet doemos të ndëshkojë mëkatin dhe Biri i Tij i vetëm mori ndëshkimin që ne meritojmë. Ky është një lajm shumë i mirë!

Lajmi i mirë! Unë jam shpëtuar për jetë! Kjo do të thotë se në vend që të ndëshkoheni përgjithmonë për mëkatet tuaja, ju jeni të shpëtuar dhe mund të shkoni në Qiell. Jezus Krishti mund t'ju shpëtojë nga ndëshkimi që ju meritoni. Ai erdhi t'ju shpëtojë nga mëkati që prish jetën tuaj. Ai do t'ju ruaj të pacënuar për jetë të jetëve. Po mos u nxitoni. Këtu ka një fjalë të vogël me shumë rëndësi. Fjala është 'nëse'. Ti do të shpëtohesh përjetë nëse beson. Ti duhet t'i besosh Jezus Krishtit që të të shpëtojë ty. Ti duhet t'i thuash Atij se ndjen keqardhje për mëkatet e tua dhe se beson tek Ai që të të shpëtojë. Atëherë, ti ke shpëtuar për jetë. Le të këndojmë sërish për Lajmin e Mirë!

Para se të paraqitni Mësimin 3, mësojuni fëmijëve këngën, 'Dashuri, dashuri, D-A-Sh-U-R-I.'

Sot ndërsa do të dëgjojmë historinë prekëse të Esterit, ne do të mësojmë diçka që Perëndia bën për fëmijët e Tij. Fëmijët e Perëndisë janë ata që kanë ardhur te Jezus Krishti dhe e kanë besuar Atë si Shpëtimtarin e tyre. Kjo këngë na ndihmon ta kuptojmë më mirë këtë dhe tek këndojmë do mësojmë më mirë të gërmëzohemi! (Këndoni reshtin e parë). Jezus Krishti, Biri i Perëndisë, ju desh ju dhe mua kaq shumë sa u largua nga Qielli duke ditur se do të shkonte drejt vdekjes. Ju dhe unë nuk i jemi bindur Perëndisë dhe mëkati ynë na mban larg Tij. Jezus Krishti na desh kaq shumë sa erdhi të vdiste për mëkatet tona.

(Këndoni 'Përfunduar, përfunduar') Nëse bëni detyrat e shkollës në mënyrë shkëlqyer, s'ka kush t'i bëjë ato më mirë. Kur Jezus Krishti vdiq për mëkatet tona, Ai bëri një sakrificë sublime për mëkatin. Asgjë më tepër s'duhet bërë për mëkatet tuaja. Por ju duhet të vini te Jezus Krishti. (Këndoni vargun 3).

Që tani eja tek Ai duke i thënë: 'I dashur Jezus, unë kam qenë i keq. Faleminderit që vdiqe për mua. Të lutem më largo mëkatet e mia.' Jezus Krishti u ngjall së vdekuri, ja pse duhet të vish tek Ai dhe të jesh i/e sigurt se Ai do të të mirëpresë. Dhe ti me besim do të këndosh vargun e fundit, I imi, i imi, I I-M-I'. Nëse ke ardhur tek Jezus Krishti dhe Ai është me të vërtetë Shpëtimtari juaj, atëherë ti je në familjen e Perëndisë dhe ajo që do të mësosh sot në Mësimin Biblik është shumë e veçantë për ty!

## Përmbajtja e Lëndës

Mësimi	Faqja
1 Esteri bëhet Mbretëreshë	
2 Madokeu qëndron besnik	
3 Një Thirrje për Ndhmë	
4 Njerëzit e Perëndisë Nderohen	
5 Esteri Lutet për Popullin e saj	
6 Populli i Perëndisë Del Fitimtar	

## Hyrie

Ngjarjet e librit të Esterit kanë ndodhur ndërmjet viteve 490 dhe 480 para Krishtit. Judejtë ishin zënë robër në Babiloni, e cila ishte bërë pjesë e Perandorisë Persiane. Danieli që kishte pasur një pozitë të lartë në oborr, tani kishte vdekur. Asuero, biri i Darit të Parë, ishte në fronin e Persisë. (Mësues, tregoni në një hartë të Lindjes së afërme të asaj kohe ku ishin Jeruzalemi, Babilonia dhe Shushani).

Ka shumë emocion dhe ankth në historinë e Esterit. Jo vetëm kaq, libri tregon qartë providencën dhe sovranitetin e Perëndisë. Edhe pse emri i Perëndisë nuk përmendet, ne shohim dorën e Tij gjatë gjithë historisë së Testamentit të Vjetër.

Në procesin mësimdhënës, sigurohuni që të mos tërhiqeni nga rrëfenja që nuk jep të vërtetat Biblike. Kini si qëllim të trajtoni qartë në çdo mësim të Vërtetën Qendrore. Është mendim i mirë të shkruani të Vërtetën Qendrore në karton apo letër e ta vendosni atë në flanelograf. Kjo i ndihmon fëmijët ta fiksojnë atë mirë në mendje.

Në fillim të çdo mësimi jepen skica të shkurtra të mësimin, të cilat tregojnë ku jepet në mësim e Vërteta Qendrore dhe ku zbatohet ajo.

P - nënkupton zbatimin për fëmijët e pashpëtuar;

SH - nënkupton zbatimin për fëmijët e shpëtuar.

Është e arsyeshme të përdoren mjete vizive e të ndërrohen skenat para fillimit të çdo mësimi. Sfondet për çdo mësim janë një ndihmë e madhe, por nuk janë thelbësorë. Kjo seri mund të jepet në një sfond të hapur biblik apo në një sfond të thjeshtë.

Si rezultat i përfitimeve gjatë mësimëve, nxënësit mund të kenë pyetje apo shqetësime shpirtërore. Në çaste të caktuara të mësimin, informoni fëmijët shkurt e qartë se jeni në dispozicion për t'i ndihmuar ata, duke u treguar edhe vendin ku fëmijët mund t'ju takojnë pas mësimin. Kjo përfshihet në tre nga mësimet e kësaj serie.

# Mësimi Një

## Esteri Bëhet Mbretëreshë

<b>Shkrimet e Shenjta:</b>	2 Mbretërve 24: 10-25, 30; Ester 1: 1-2:20
<b>E Vërteta Qendrore:</b>	Perëndia ka plane për secilin nga fëmijët e tij.
<b>Zbatimi:</b>	Për fëmijët e <b>pashpëtuar</b> : Duhet doemos të pranoni Jezus Krishtin si Shpëtimtarin dhe Perëndinë tuaj para se të njihni planet që ka Perëndia për ju. Për fëmijët e <b>shpëtuar</b> : Binduni Perëndisë dhe ju do mësoni planet që Ai ka për ju.
<b>Skica e Mësimi:</b>	Esteri dhe Mardoheu jetojnë në tokë të huaj – në Persi VQP Mbreti i Persisë shtron një banquet Mbreti thërret Vashtin Vashti refuzon të vijë VQ Vashti humb pozitën e saj Kërkimi për vajza të bukura Esteri sillet në pallat VQSH Esteri ruan të fshehtat e saj VQSH Esteri bëhet mbretëreshë VQSH, P
<b>Mjetet Vizive:</b>	<b>Piktura 1-1 – 1-7</b>
<b>Vargu për t'u mësuar përmendësh:</b>	Jeremia 29:11 <i>'Sepse unë i njoh mendimet që kam për ju', thotë Zoti, 'mendime paqeje dhe jo të së keqes, për t'ju dhënë një të ardhme dhe një shpresë.'</i>

## Mësimi

### Hyrja

'Pse nuk rri dot vonë të shoh Televizor?'  
'Pse lakuriqët e natës nuk përplasen tek fluturojnë qark?'  
'Pse duhet të qajnë fëmijët?'  
'Pse? Pse? Pse? Kemi shumë pyetje me Pse, apo jo?'  
Jam i sigurt se vogëlushja Ester shpesh bënte pyetjen, 'Pse?'  
'Ndoshta psetë e saj kishin një tingëllimë të tillë.

(Vendosni rripin e letrës ESTER)

### Piktura 1- 4

'Pse ne jemi ndryshe nga njerëzit e tjerë në Shushan?' Kushëriri i saj Mardoheu i jepte përgjigje. Ne jemi Judej, populli i zgjedhur i Perëndisë. Ne adhurojmë dhe i bindemi Perëndisë, sepse Ai është Perëndia i vetëm i vërtetë.'

Esteri kishte pyetje të tjera. 'Pse nuk janë Judej të gjithë njerëzit e Shushanit?'

'Shumë, shumë kohë më parë,' u përgjigj Mardoheu, 'Perëndia i dha popullit të Tij tokën e tyre: Por ata nuk iu bindën Atij dhe filluan të adhuronin perënditë e rreme. Perëndia - Zot përdori mbretërit dhe ushtritë për të ardhur në tokën e tyre si dënim. Këto ushtri kapën shumë Judej dhe i çuan ata në tokën e tyre. Kjo është arsyeja pse ne jetojmë në Persi. Stërgjyshërit tanë ishin nga robërit e kapur.'

'Pse nuk jetoj bashkë me nënën e babën?' mund të ketë pyetur Esteri.

'Ata kanë vdekur, Ester,' shpjegoi trishtueshëm Mardoheu. 'Por, unë do të kujdesem për ty.' Dhe ai u kujdes për të gjatë gjithë viteve të fëmijërisë së saj.

Ka shumë gjëra të trishtuara në jetën e Esterit, por mrekullia është se Perëndia kishte

një plan për jetën e saj. Ajo ishte një hebre jetime dhe shumë njerëz nuk shihnin gjë të veçantë tek ajo. Por ajo ishte e 'veçantë' për Perëndinë. Ai në të vërtetë kishte plane shumë të mira për jetën e saj. Kjo është e vërtetë për çdo fëmijë të Perëndisë. Në se je fëmijë i Perëndisë, Ai ka për ty plane të veçanta.

Cilët janë fëmijët e Perëndisë? Bibla na mëson 'Por të gjithë atyre që e pranuan, Ai u dha pushtetin të bëhen bij të Perëndisë, atyre që besojnë në emrin e Tij. (Gjoni 1:12).

Kjo nënkupton se nëse ti i kërkon Jezusit Perëndi të largojë mëkatet e tua e të marrë përsipër jetën tënde dhe ti këtë e ke seriozisht, në atë çast ti bëhesh fëmijë i Perëndisë. Secili prej nesh duhet të pranojë Krishtin si Perëndinë dhe Shpëtimtarin tonë. Janë fëmijët e Perëndisë që mësojnë se Perëndia ka një plan të veçantë për ta, ashtu sikundër Ai pati plane të mëdha për Esterin.

### **Piktura 1 - 1**

Dhe le të shkojmë tani në një shtëpi ndryshe nga ajo e Esterit. Shtëpia mbizotëronte qytetin e madh të Shushanit. Nëse do të shëtisnit rreth saj, do t'ju duhej të bënit 4 kilometra udhë. Ky ishte një vend shumë, shumë i rëndësishëm, pallati i Mbretit të Persisë. Persia asokohe ishte kombi më i madh i botës. Aty Mbreti Asuero qëndronte në fron dhe sundonte perandorinë e tij të madhe.

Në këto çaste ai po jepte një banket të madh. Ai po planifikonte një betejë tjetër dhe para se ta fillonte atë, mbledhi shumë njerëz të rëndësishëm për të festuar e thurur plane. Komandantët e ushtrisë së tij, fisnikët dhe princat qëndronin grumbull në kopshtin e pallatit. Ky ishte një banket që do të mbahej mend, ai vazhdoi për 180 ditë me radhë!

Çfarë pallati për banket! Në kopshtet e pallatit, shtyllat e mermerta ishin veshur me perde bardhe e blu të kapura me unaza argjendi. Rugët ishin shtruar me mermer të ngjyrave të ndryshme. Aty këtu kishte ndenjësë të praruara.

Shtatë ditët e fundit të banketit, në pallat u ftuan të gjithë banorët e Shushanit. Mbretëresha po jepte një banket të veçantë për gjithë gratë.

Mbreti krenar donte që çdokush të shihte sa i pasur e i fuqishëm që ai ishte. Ai demonstronte pasurinë dhe thesarin. Ditën e fundit ai kishte kaluar masën e verës. Por ai ende mendonte, 'Si mund t'u tregoj këtyre njerëzve sa i madh, i fuqishëm e i pasur unë jam?' Në kokë i lindi një mendim. '*Mbretëresha duhet të vijë në banketin tim,*' mendoi ai. '*Ajo është një grua shumë e bukur. Ata sigurisht do*

*të mendojnë se unë jam i madhërishtëm që kam një mbretëreshë kaq të bukur.'*

### **Piktura 1 - 2**

Menjëherë dërgoi shtatë shërbëtorë të sillnin mbretëreshën. Madje, edhe emri i saj Vashti nënkupton bukuri. Mbreti po priste. Ndoshta, ai u ishte mburrur komandantëve, fisnikëve dhe princave për mbretëreshën e tij.

Shtatë shërbëtorët u këthyen. 'Mbretëresha refuzon të vijë,' i thanë ata mbretit. Bibla nuk na thotë pse Vashti nuk do të vinte, por na thotë se Mbreti Asuero u inatos shumë. Plani i tij kishte dështuar! Ky mbret i madh nuk e dinte se kishte një Perëndi të plotfuqishëm dhe se gjithçka që po ndodhte ishte në planet e Tij. Madje, kishte të bënte edhe me planet e Tij për jetimen hebre -Ester. Është mirë të mbahet mend se Ai që ka plane për fëmijët e tij është i plotfuqishëm. Ka raste kur edhe ne kemi ide por nuk jemi në gjendje t'i vëmë ato në jetë. Por nuk është kështu me Perëndinë. Ai mundet të zbatojë planet e Tij. Nëse je fëmijë i Perëndisë mos e harro këtë. Mos harro se planet që Ai ka për ty janë të mira. Ai është një Perëndi i mirë dhe i plotfuqishëm. Ai thotë në Fjalën e Tij, vullneti i Perëndisë është 'i mirë, i pranueshëm dhe i përsosur'. (Romakëve 12:2)

Nëse je fëmijë i Perëndisë kërkoji të të ndihmojë t'i bindesh Atij në mënyrë që ti të ecësh në udhët e Tij të përsosura. Është gjë e mrekullueshme të mësosh se Perëndia ka një plan të mirë për ty edhe atëherë kur duken se punët po shkojnë keq.

### **Piktura 1 - 3**

Gjithçka dukej se po shkonte keq në pallatin mbretëror. Pa humbur kohë Mbreti Asuero u konsultua me njerëzit e tij të mençur.

'Sipas ligjit çfarë duhet t'i bëhet mbretëreshës Vashti?' pyeti ai.

Udhëheqësi i njerëzve të mençur u përgjigj, 'Mbretëresha Vashti nuk ka vepruar drejt vetën ndaj mbretit, por edhe ndaj princave dhe tërë popujve që janë në të gjitha krahinat e mbretit Asuero. Sjellja e mbretëreshës do të merret vesh nga të gjitha gratë që do të nxiten të përçmojnë burrat e tyre dhe telashet që ky veprim do të shkaktojë s'do kenë fund.'

'Mbreti duhet të lëshojë një urdhëresë mbretërore ku të thotë se Vashti nuk është më mbretëreshë. Kur gratë do ta dëgjojnë këtë, ato do të respektojnë burrat e tyre.'

Ky ligj duhej të shkruhej në ligjet e Persisë dhe ligje të tilla s'do ndryshonin kurrë.

Me të shpejtë, mesazhet u përgatitën për t'u dërguar në gjithë perandorinë e madhe. Kalorësit u nisën me kopjet e këtij ligji. Shpejt

u përhap lajmi i ligjit të ri se mbretëresha Vashti nuk ishte më mbretëreshë. Ajo s'do të dilte më kurrë para mbretit.

Pas pak kohe, Mbretit Asuero i kaloi inati dhe filloi të mendonte Vashtin. Këshilltarët e panë se po mendonte për të. Dhe ata sugjeruan, 'Të kërkohe për mbretin në gjithë perandorinë vajza të hijshme.' 'Vajzat të sillen në pallat dhe mbreti të zgjedhë më të bukurën për të qenë mbretëresha e tij.'

Mbreti mendoi se kjo ishte ide e mirë dhe menjëherë filloi kërkimi.

#### **Piktura 1 - 4**

Gjithë këto gra të bukura u sollën në një shtëpi në kopshtet e pallatit. Për to tregohet kujdes i veçantë nga shërbëtorët e mbretit.

Një nga vajzat e reja ishte veçanërisht popullore dhe shumë e bukur. Ajo ishte vajza hebre, Ester. Nga që ishte shumë e bukur, asaj i duhej të linte shtëpinë e të vinte në pallat. Esteri i përkiste Perëndisë së vetëm real. Pallati i mbretit pagan duhej të ishte vendi i fundit ku mund ta shihje atë. Ajo duhej të ketë qenë e trishtuar kur i la lamtumirën Mardokeut.

Pse ndodhi kjo? Perëndia e donte Esterin në pallat. Ndoshta ti je i krishteri i vetëm në familje. Perëndia ka arsye të shëndoshë të të ketë ty atje. Ai do që ti t'i tregosh të tjerëve ndryshimin që Zoti Jezus ka sjellë në jetën tënde. Sill nder mend klasën e shkollës. Perëndia të ka ty atje, që ata që nuk e njohin Zotin Jezus të kenë dikë që t'ju tregojë se ç'do të thotë të jesh i krishterë. Ka raste kur në shkollë është vështirë të jetosh për Të, por a nuk ndihmon të dish se për ty do të ndodhë vetëm ajo që do të lejojë Perëndia? Kjo ndihmon të mos qahesh e ankohesh kur kujton se planet e Perëndisë për ty janë të mira. Natyrisht, kjo është gjëja më e mirë.

Ju jo gjithmonë e dini pse ju ndodhin gjëra të trishtueshme e të vështira, por Perëndia ka arsye që i lejon ato të ndodhin. Një ditë edhe Esteri do ta zbulonte këtë fakt edhe pse akoma nuk e dinte pse Perëndia donte që ajo të ishte në pallat.

#### **Piktura 1 – 5**

Kur arriti në pallat, Esterit iu caktuan shtatë vajza për t'u kujdesur për të. Madje, asaj iu dha vendi më i mirë në shtëpinë e grave.

Të gjitha vajzat e reja trajtoheshin për 12 muaj në drejtim të përsosjes së bukurisë para se të shkonin te mbreti. Pastaj, ato paraqiteshin një e nga një. Ato mund të merrnin gjithçka që mendonin se i bënte të bukura. A nuk i shihni tek zgjedhin rrobat dhe xhevahiret? Tek kalonin para mbretit, secila mendonte se ajo do të zgjidhej mbretëreshë.

Çdo ditë, Mardokeu, kushëriri i Esterit, shëtiste poshtë e lartë shtëpisë ku ishin gratë. Ai donte të mësonte si po shkonte Esteri.

Esteri nuk e shihte atë dhe ai nuk shihte Esterin. Ishte një rregull i kopshtit Persian. Por disa nga shërbëtorët duhet ta kenë njoftuar Esterin për Mardokeun.

Mardokeun e shqetësonte një gjë. Ata të dy kishin një të fshehtë. Ai i kishte thënë asaj që të mos i thoshte kujt në pallat. A e mendoni se cila ishte e fshehta? Po, Esteri ishte Jude. Kjo ishte e fshehta e tyre. Edhe pse Esteri nuk kuptonte pse nuk duhej thënë e vërteta, ajo nuk e bëri atë sepse Mardokeu e kishte porositur atë. Kur ajo i bindej Mardokeut, ajo i bindej Perëndisë.

Është e rëndësishme të mbani mend se janë ata që i binden Perëndisë që zbulojnë planet e Tij për jetën e tyre. Kur të lexoni Biblën, sigurohuni se i bindeni asaj. Nëse si i krishterë ti nuk i bindesh Perëndisë, ti humbet gjithçka që Ai ka planifikuar për ty. Por Esteri i bindej Perëndisë, sepse ajo respektonte dhe i bindej Mardokeut që kishte zënë vendin e prindërve të saj. Urdhri i Perëndisë është 'Ndero nënën e babën tuaj.' Kështu, Esteri e dinte se duhej të ruante të fshehtë.

Mardokeu pyeste veten aty jashtë në kopsht, 'a do të jetë në gjendje të ruajë të fshehtën? A do ta njohë dikush?' Të presim si do të zhvillohen ngjarjet.

#### **Piktura 1-6**

Më në fund erdhi dita kur Esteri do të shkonte të paraqitej para mbretit. Shërbëtorja përgjegjëse i tha asaj ç'të vishte dhe ajo bëri si i tha ajo. Ajo nuk zgjodhi gjë tjetër që ta bënte atë të bukur. Ajo ishte e bukur dhe xhevahiret dhe rrobat luksoze do të kishin prishur bukurinë e saj. Ajo ishte edhe shumë popullore. Të gjithë e donin atë.

Mbreti e mendoi Esterin më të bukur se gjithë vajzat e tjera. Ai vendosi që ajo të bëhej mbretëresha e tij. Kurora mbretërore u vendos në kokën e saj. Tani ajo ishte Mbretëresha Ester! Ajo ishte mbretëresha e një perandorie të madhe. Kjo ishte një pjesë e asaj që Perëndia kishte planifikuar për të. Nëse je femijë i Perëndisë, mos harro se Ai ka plane edhe për ty. Ato janë planet më të mira. Ti i zbulon planet e Tij kur t'i i bindesh Atij. Tek maturohesh, pyet Perëndinë të të tregojë se çdo Ai që të bëhesh. Ndoshta, Ai do që ti të bëhesh shofer kamioni, infermier, mësues, punëtor uzine apo misionar. Kërkoji Perëndisë të të ndihmojë të shkosh gjithmonë në rrugën që ai ka planifikuar për ty. Jo gjithmonë mund të jetë rruga që keni zgjedhur ju. Hera herës mund të jetë rrugë shumë e vështirë. Rëndësi

ka që ti të zbatosh vullnetin e Tij. Bibla thotë të Jeremia 29:11, *'Sepse unë i njoh mendimet që kam për ju', thotë Zoti, 'mendime paqeje dhe jo të së keqes, për t'ju dhënë një të ardhme dhe një shpresë.'*

Rruga e Perëndisë për Esterin ishte e çuditshme, por e përsosur. Ja tek ishte në pallatin mbretëror. Por, do të ishte ajo në gjendje të ruante të fshehtë? Këtë do ta mësoni ditën tjetër.

### **Piktura 1 – 7**

Mendoni për Esterin që na kujton se Perëndia ka plane të mrekullueshme për secilin nga fëmijët e tij. Ndoshta, ti nuk di gjë për këtë sepse nuk je fëmijë i Perëndisë. A dëshiron realisht të bëhesh fëmijë i tij? Rruga e vetme është të largohesh nga çdo e keqe në jetë e të pranoni Zotin Jezus si Shpëtimtarin dhe Mbretin tënd. Ti mund t'i thuash atij që tani: 'I dashur Zoti Jezus, falmi gjithë mëkatet,

falmë ecjen në rrugën time. Faleminderit që vdiqët për mua i kryqëzuar në kryq. Të kërkoj tani të më shpëtosh, të marrësh në dorë jetën time e të më bësh sikundër dëshiron Ti.' Dhe atëherë ti do të fillosh të zbulosh rrugën e Tij që ai ka për ty.

I ri dhe e re e krishterë, a nuk është emocionuese të mësosh se Perëndia ka plane për ty? Kur ndodhin gjëra të trishtueshme apo shkurajuese, mos harroni se udha e Perëndisë është më e mira. Rruga për të njohur planet e Perëndisë është t'i bindesh Atij. Ndoshta ka diçka për të cilën ti nuk bindesh. Mos vazhdo me mosbindjen tënde. Kthehu nga ajo udhë sot, kërko që Perëndia të të falë. Ti mund t'i thuash Atij: 'I dashur At Qiellor, më fal për mosbindjen ndaj Teje në këtë mënyrë. Të kërkoj ndihmën Tënde që të mos e bëj më kurrë. Faleminderit për premtimin Tënd për të na falur kur ne rrëfejmë mëkatet tona.' Janë fëmijët e bindur të Perëndisë që gëzojnë planet e veçanta të Perëndisë.

# Mësimi Dy

## Mardokeu Mbetet Besnik

<b>Shkrimet e Shenjta:</b>	Esterit 2:21- 4:3
<b>E Vërteta Qendrore:</b>	Qëndroni besnik Perëndisë sikundër ishte Mardokeu.
<b>Zbatimi:</b>	Për fëmijët e <b>shpëtuar</b> : Ju duhet t'i bindeni Perëndisë dhe të njiheni si të krishterë edhe atëherë kur është e vështirë.
<b>Skica e Mësimi:</b>	Mardokeu dëgjon komplotin për vrasjen e mbretit Ai raporton për këtë VQSH Mbahet shënim raportimi i tij por ai nuk merr kurrfarë shpërblimi VQSH  Hamani gradohet Të tjerët duhet të përkuleshin para Hamanit Mardokeu refuzon VQSH Zyrtarët i thonë Hamanit pse Mardokeu nuk përkulej VQSH Hamani komploton të vrasë Judejtë Hamani kërkon lejen e mbretit Leja jepet Përhapet lajmi se në ditën e trembëdhjetë të muajit të dymbëdhjetë çifutët do të vdesin VQP Mardokeu pikëllohet VQSH
<b>Mjetet Vizive:</b>	<b>Pikturë 2-1 - 2-7</b>
<b>Vargu për t'u mësuar përmendësh:</b>	Përsëritni Jeremia 29:11 'Sepse unë i njoh mendimet që kam për ju', thotë Zoti, 'mendime paqeje dhe jo të së keqes, për t'ju dhënë një të ardhme dhe një shpresë.'

## Mësimi

A mund të mbani një të fshehtë? Mardokeu shpresonte se Esteri ishte në gjendje të ruante të fshehtën! A e mbani mend se cila ishte e fshehta? Po, që Esteri ishte jude!

### Piktura 2-1

Mardokeu ishte shërbëtor i mbretit. Ai punonte në portën e pallatit. Ai duhet të ketë parë shumë njerëz interesantë që hynin e dilnin nga porta. Ai duhet të ketë dëgjuar kalimtarët të bisedonin.

Një ditë ai picërroi veshët për të dëgjuar më me kujdes.

Kjo tingëllonte si komplot! Tek dëgjonte, Mardokeu zbuloi se dy njerëz po komplotonin të vrisnin mbretin Asuero.

Mardokeu e dinte se diçka duhej bërë që të ndalte komplotin e poshtër. Pa humbur kohë,

ai i dërgoi Esterit fjalë dhe Esteri ia çoi lajmin mbretit. Nëse je fëmijë i Perëndisë, e sjell dot nder mend si je bërë i tillë? (*Shkurtimisht përsëritni mësimin e javës së shkuar*) Nëse je fëmijë i Perëndisë, ti duhet të jesh besnik i Tij ashtu sikundër ishte Mardokeu. Të jesh besnik do të thotë të bësh atë që thotë Perëndia edhe atëherë kur është e vështirë. Do të ketë momente kur ti duhet të ngresh zërin kundër së keqes. Ndoshta disa nxënës në klasën tënde sillen keq ndaj Maikut. Ata tallen me të, e vënë atë në lojë, madje nuk luajnë me të. Ata luajnë me ty, por nuk luajnë me Maikun. Si i krishterë, çfarë duhet të bësh? (*Lërimi fëmijët të përgjigjen*) Nëse dëshiron të bësh atë që do Perëndia, duhet qetësisht të thoni, 'Unë mendoj se edhe Maikun duhet ta futim në skuadër.' Ndoshta, ti mund të luash me Maikun duke i treguar të tjerëve se ti dëshiron të jesh mik me të. Fëmijët e Perëndisë nuk duhet të lejojnë të ndodhin gjëra të këqija e të pahijshme. Ata duhet të përpiqen t'i ndalojnë



ato. Ji besnik i Perëndisë sikundër ishte Mardokeu. Dhe tani mbreti kishte dijeni për komplotin. U bë një hetim i kujdesshëm. Dy njerëzit e dyshuar u gjendën fajtorë dhe u varën.

Dhe pastaj gjithçka u regjistrua në librin e mbretit. Edhe emri i Mardokeut u shkruat aty. Mbreti s'duhet ta ketë vënë re emrin e tij, sepse ai nuk i dha atij ndonjë shpërblim apo dhuratë siç bënin mbretërit kur dikush u bënte një favor të tillë.

Shpesh kur je besnik ndaj Perëndisë, askush nuk të falenderon apo të lavdëron. Dikur jetonte një djalë me emrin Toni. Disa nga shokët e tij ishin futur në një kopsht dhe po shijonin mollët e kuqe të lëngshme.

'Na Toni, merr një. Janë me të vërtetë të mira.'

'Jo, faleminderit,' tha Toni qetësisht.

'E pse jo?' pyeti shoku i tij.

'S'do isha shumë i lumtur po të merrja mollë të vjedhura,' sqaroi Toni.

'Toni është djalë mamaje,' u tall shoku i tij, 'Dhe ne s'ka ç'na duhen djem të tillë në shoqërinë tonë, apo jo?'

Toni shkoi në shtëpi i mbushur me trishtim. Atij i pëlqente të luante me shokët. Por, në shpirt ai e dinte se i ishte bindur Perëndisë. Perëndia ishte i kënaqur që ai kishte qëndruar besnik ndaj Tij. Ka më shumë rëndësi të kënaqësh Perëndinë sesa njerëzit. Bibla thotë, 'Duhet t'i bindemi Perëndisë më shumë sesa njerëzve.' (Veprat 5:29) Kjo është ajo që bëri Mardokeu.

## **Piktura 2 – 2**

Më vonë, Mbreti Asuero vendosi të gradojë Hamanin, njërin prej njerëzve të tij. Ai e bëri atë njeriun më të rëndësishëm se gjithë fisnikët e tjerë. Të gjithë shërbëtorët dhe zyrtarët u urdhëruan nga mbreti të përkuleshin para Hamanit krenar.

Tek ecte me krenari përmes portës, të gjithë shërbëtorët e mbretit përkuleshin thellë drejt tokës. Sa krenar duhet të jetë ndjerë Hamani me gjithë këta shërbëtorë që përkuleshin para tij! Por, njeri prej tyre nuk përkulej. E gjeni se cili ishte? Po, Mardokeu.

## **Piktura 2 - 3**

Bibla nuk na e thotë shkakun pse nuk përkulej Mardokeu, por ne mendojmë sepse atij i kërkohej të adhuronte Hamanin. Kjo ishte diçka që ai nuk mund ta bënte. Ligji i Perëndisë thotë, 'Ju s'duhet të keni perëndi të tjera para Meje.' Njerëzit e Perëndisë nuk mund të adhurojnë tjetër gjë apo njeri veç Perëndisë. Mardokeu duhet ta dinte se mospërkulja para Hamanit do ta vinte atë në

telashe. Por, ai donte t'i mbeste besnik Perëndisë edhe në kohë të vështira. Kjo është ajo që pret Perëndia nga ju nëse jeni fëmijë i Perëndisë. Ai do që ju të zbatoni urdhrat e Tij e të tregoni se ju i përkisni Atij. Të jesh besnik ndaj Perëndisë do të thotë t'i bindesh Atij edhe pse kjo mund të jetë e vështirë.

Ndoshta ndodhni diku jashtë duke luajtur me shokët. Babai ju ka thënë të kthejeni në shtëpi në orën gjashtë. Loja s'ka mbaruar. Shoku ju thotë, 'Hajde, qëndro deri në fund të lojës.' Urdhri i Perëndisë është, 'Nderoni babanë dhe nënën tuaj.' Nëse do t'i qëndroni besnik Perëndisë, ju duhet të thoni, 'Më vjen keq, por më duhet të largohem tani.' Është gjë e mrekullueshme se Perëndia u jep fuqinë të jeni besnik ndaj Tij. S'do ketë kurrë as edhe një moment që Ai të mos ju ndihmojë ju të bëni atë që është e drejtë. Ai është besnik ndaj fëmijëve të Tij dhe kjo është arsyeja pse ata duhet të jenë besnikë ndaj Tij. Për këtë Mardokeu ishte i sigurt.

## **Piktura 2 – 4**

Zhurmë e madhe u bë kur Mardokeu nuk u përkul para Hamanit. Disa nga zyrtarët mbretërorë e pyetën atë, 'Pse nuk e zbatoni urdhrin e mbretit?' Por ai vazhdonte të mos përkulej.

Dhe zyrtarët shkuan e i rrëfyan Hamanit, 'Mardokeu nuk do të përkulet para jush; ai është judë.' Mardokeu njihej që ishte judë. Po ju njiheni si i krishterë? A ju ka pyetur dikush, 'Pse shkoni në shkollën e së Dieles?' A ia shpjeguat se ju jeni i krishterë? Në familje, a e dinë prindërit, vëllezërit e motrat se ju ndihmoni në shtëpi apo lexoni Biblën sepse jeni i krishterë? Nëse do të jeni besnikë ndaj Perëndisë, ju duhet të njiheni si i krishterë. Ne lexojmë në Fjalën e Perëndisë, 'Ju jeni dëshmitarët e mij, thotë Perëndia' (Jeremia 43:10a). Nëse doni të jeni dëshmitar, ju s'mund ta mbani të fshehtë se jeni i krishterë.

Ndoshta për momentin mund të keni ndonjë shqetësim lidhur me besnikërinë ndaj Perëndisë. Ju dëshironi të flisni me dikë rreth këtij shqetësimi. Unë do të isha i gëzuar të bisedoja e të lutesha me ju. Eja më takoni (*çaktoni vendin*) pas mësimit. Ka rëndësi që ju të jeni besnik ndaj Perëndisë sikundër ishte edhe Mardokeu.

Kur Hamani pa se Mardokeu nuk përkulej para tij, u tërbua nga inati. Mendja e tij e poshtë e shtazore thuri hakmarrjen. Ai ishte aq i inatosur sa si bëhej vonë të hiqte qafe një njeri. Ai donte të shkatërronte të gjithë çifutët.

## **Piktura 2 - 5**

Ai nxitoi te njerëzit e tij mendjendritur për të mësuar ditën fatlume të zbatimit të komplotit të poshtër. Në fund, njerëzit me mendje të ndritur i thanë atij se dita e trembëdhjetë e muajit dymbëdhjetë do të ishte dita fatlume. Persianët nuk e dinin se ishte Zoti dhe jo fati i mirë apo i keq që sundonte mbi gjithë ditët. Kështu, Hamani ishte i bindur se ai do të kishte fat në zbatimin e planeve të tij kundër judejve.

Por fillimisht, ai duhej t'i tregonte mbretit planet e tij dhe ai e bëri këtë në një mënyrë shumë tinëzare: 'Ka një popull të shpërndarë dhe të veçuar nga popujt e të gjitha krahinave të mbretërisë sate, ligjet e të cilin ndryshojnë nga ato të cilin do populli tjetër dhe që nuk respektojnë ligjet e mbretit; prandaj nuk ka asnjë përfitim t'i lëmë të gjallë. Në rast se kjo i pëlqen mbretit, të përpilohet një dekret për shkatërrimin e tyre; dhe unë do të paguaj dhjetë mijë talenta argjendi në duart e atyre që kryejnë punën, me qëllim që të derdhen në thesaret e mbretit.' Hamani dhelparak nuk tha se ishin judejtë ata që ai do të shkatërronte.

Mbreti Asuero nuk pati kurrfarë dyshimi. Ai ra dakord me planin. Madje, ai hoqi unazën me vulën dhe ia dha Hamanit. Kjo donte të thoshte se Hamani mund të ngjyente unazën në dyllë për të vulosur ligjin. Dhe çdokush do të mësonte se ky ishte ligji i mbretit Asuero dhe askush nuk mund ta ndryshonte.

'Ti s'duhet të paguash gjithë të hollat,' i tha mbreti Hamanit. 'Bëj me ata njerëz si të dëshirosh.'

Punët po shkonin më mirë se ç'kishte menduar Hamani.

Shpejt ligjet u shkruan dhe u vulosën me vulën e mbretit, me unazën që tani e mbante Hamani.

## **Piktura 2 – 6**

Kalorësit e çuan mesazhin në të gjithë perandorinë. Persianët kishin forma të shumta për përhapjen e shpejtë të lajmeve. Kalorësit hipën mbi kuaj, mushka e deve për një farë rruge, më tej kafshë e kalorës të tjerë përçonin më tej lajmin për t'u zëvendësuar nga kafshë e kalorës të tjerë. Kështu mesazhi u përhap me shpejtësi të madhe. Kësaj here mesazhi ishte shume i trishtueshëm. Ishte bërë ligji që në ditën e trembëdhjetë të muajit të dymbëdhjetë

të vriteshin gjithë Judejtë. Kjo ditë e tmerrshme nuk ishte larg më shumë se 11 muaj.

## **Piktura 2 – 7**

Mesazhi u shpërnda në gjithë Shushanin, kryeqytetin e vendit. Judejtë duhet të jenë shokuar -në ditën e trembëdhjetë të muajit të dymbëdhjetë ata do të vdisnin të gjithë.

A nuk do të ishte më mirë sikur Mardoheu të ishte përkulur para Hamanit sa të viheshin gjithë judenjtë në një telash të tillë? Nëse Mardoheu e dinte thellë në shpirt se përkulja e thellë nënkuptonte adhurimin e Hamanit, ai kishte të drejtë t'i bindej Perëndisë. Ne mësojmë se Bibla thotë, 'Duhet t'i bindemi Perëndisë më shumë sesa njerëzve.' (Veprat 5:29) Ne duhet ta bëjmë këtë edhe kur është shumë, shumë e vështirë. Kjo është të jesh besnik ndaj Perëndisë.

Por, mos harroni Perëndia do t'ju ndihmojë. Ai do t'ju fuqizojë kur gjërat të vështirësohen. Jini besnikë ndaj Tij sepse Ai premtan që të jetë besnik ndaj jush. 'Mos ki frikë, sepse unë jam me ty, mos e humb, sepse unë jam Perëndia yt. Unë të forcoj ' (Isaia 41:10a). Mos e harroni këtë premtim të mrekullueshëm kur punët vështirësohen.

Mardoheu u mërzi të tepërmi kur dëgjoi këtë lajm të tmerrshëm. Ai shqeu rrobat e veta dhe e mbuloi trupin e tij me një thes e hi. Në kohët Biblike, njerëzit vishnin roba të vjetra prej thesi për të treguar dhimbjen e madhe. Mardoheu lëshonte britma tek shkonte në qendër të Shushanit.

Mbas këtij lajmi të tmerrshëm të përhapur gjithkund, ç'po bënte mbreti me Hamanin? Ata ishin ulur e po kënaqeshin duke pirë. Hamani dhe mbreti nuk e dinin se ç'kuptim kishte ky ligj në pallat. Esteri e kishte ruajtur të fshehtë. Ne do të presim për të parë se ç'do ndodhë.

Por, nëse je fëmijë i Perëndisë, mos harro t'i bindesh Atij. Mos ki turp të thuash se je i krishterë. Jeto për Perëndinë. Edhe kur ke vështirësi, qëndro besnik sikundër qëndroi Mardoheu. Perëndia do të jetë besnik ndaj teje. Bibla na thotë, 'Perëndia është besnik.' (1 Korintasve 1:9)

# Mësimi Tre

## Thirrje për Ndhimë

<b>Shkrimet e Shenjta:</b>	Ester 3:15b-4:17
<b>E Vërteta Qendrore:</b>	Perëndia dëgjon dhe iu përgjigjet lutjeve të fëmijëve të Tij.
<b>Zbatimi:</b>	Për fëmijët e <b>shpëtuar</b> : Ju duhet të flisni shpesh me Të për t'i paraqitur të gjitha problemet.
<b>Skica e Mësimi:</b>	Hebrenjtë qajnë e agjërojnë VQ Esteri dëgjon për brengosjen e Mardokeut Esteri i dërgon Mardokeut rroba Mardokeu i refuzon ato Esteri dërgon Harthakun te Mardokeu Harthaku i jep Esterit mesazhin nga Mardokeu Esteri ka frikë të shkojë të mbreti VQSH Esteri i dërgon mesazh Mardokeut, 'Unë s'mund ta bëj atë.' Mardokeu i përgjigjet, 'Duhet me doemos.' Esteri vendos të shkojë Esteri dhe judejtë agjërojnë VQSH Esteri shkon në kopshtin e brendshëm Mbreti zgjati skeptrin prej ari VQSH
<b>Mjetet Vizive:</b>	<b>Pikturë 3-1 – 3-7</b>
<b>Vargu për t'u mësuar përmendësh:</b>	'Sytë e Zotit janë mbi të drejtët dhe veshët e tij janë të vëmendshëm të kapin britmat e tyre.' (Psalmeve 34:15)

## Mësimi

### Piktura 3-1

Lajmi u përhap me shpejtësi dhe po kështu dëshpërimi. Kur Judejtë dëgjuan se çdo u ndodhte në ditën e trembëdhjetë të muajit dymbëdhjetë, ata qanë dhe veshën në trup thasë. Ata filluan të mos marrin ushqim, pra të agjërojnë. Hera herës njerëzit agjërojnë nëse ata duan realisht të përqendrohen në kalimin e kohës me Perëndinë, duke i kërkuar Atij ndihmë.

Judejtë e dinin se vetëm Perëndia mund t'i shpëtonte ata nga shkatërimi. Gjatë atyre ditëve shumë Judej thërrisnin Perëndinë për ndihmë.

Ata e dinin se në të shkuarën Perëndia kishte dëgjuar lutjet e popullit të Tij. Bibla e bën të qartë se Perëndia është ende njësoj. Ai dëgjon kur luten fëmijët e Tij dhe Ai iu përgjigjet lutjeve të tyre. Një nga fëmijët e Tij shkroi këto fjalë në Bibël, 'Me zërin tim i thirra Zotit dhe ai mu përgjigj nga mali i tij i shenjtë.' (Psalmeve 3:4) Janë vetëm fëmijët e Perëndisë që mund të jenë të sigurt se Perëndia i dëgjon dhe iu përgjigjet lutjeve të tyre. A je ti fëmijë i Perëndisë? Ti bëhesh i tillë kur pranon Zotin Jezus si Shpëtimtarin dhe Perëndinë tënd. Nëse po, Perëndia është Ati yt i dashur Qiellor. Ai do që ti t'i flasësh. Ai gjithmonë të dëgjon. Ai është kaq i madhërishtëm e i fuqishëm. Ai gjithmonë mund të të ndihmojë.

Një natë, kjo e vërtetë u bë fakt real për një djalë të krishterë. Ai jetonte larg qytetit, në një fermë të vetmuar me nënën e babën. Një natë babai i tij u sëmur rëndë dhe nëna i kërkoi djalit të shkonte të njoftonte doktorin. Nuk kishte mënyrë tjetër për të njoftuar doktorin.

Rruga më e shkurtër për të shkuar në qytet të njoftonte doktorin ishte të shkonte me kalë. Por djali kishte frikë të shkonte natën me kalë. E ëma këmbënguli dhe djali i kërkoi Perëndisë ta ndihmonte. I hipi kalit dhe tek ecte drejt qytetit lutej. Perëndia e solli shëndoshë e mirë në shtëpinë e doktorit, i cili erdhi menjëherë. Si rezultat, i ati u bë përsëri mirë. Atë natë, djali kuptoi në mënyrë të veçantë se Perëndia dëgjon dhe iu përgjigjet lutjeve të fëmijëve të Tij.

Judejtë e dinin se kishin nevojë për Perëndinë në këtë kohë të vështirë. Asnjë problem nuk është i pazgjidhshëm për Të, as edhe problemi i komplotit të Hamanit të keq.

Në pallat Mbretëresha Ester s'dinte gjë për planet mizore të Hamanit. Ajo s'kishte dëgjuar se ç'do i ndodhte popullit të saj. Dhe natyrisht, ajo ende e mbante të fshehtë se ishte Jude.

Një ditë vajzat i sollën Esterit lajme të çuditshme. 'Mbretëresh Ester, diçka ka ndodhur që ka pikëlluar së tepërmi Judejtë. Ata duken tepër të frikësuar. Ata po veshin thasë dhe po ulen mbi hi. Edhe Mardoheu po qëndron jashtë në rrugë para pallatit i veshur me rrobe thesi të shëmtuara.' (Asokohe, ishte zakon i njerëzve që kishin dëshpërim të madh të vishnin rrobe thesi e të uleshin mbi hi, ashtu sikundër disa njerëz sot veshin rroba të zeza kur u ka vdekur njeriu i tyre i dashur.)

Mbretëresha u pikëllua shumë kur dëgjoji lajmin për popullin jude. Vajzat duhet të jenë habitur, por ato nuk e pyesnin dot mbretëreshën!

*'Çfarë nuk shkon? Mendoi Mbretëresha Ester. 'Sikur të flisja me Mardoheun, por kjo është e pamundur. Duhet ta mësoj patjetër. Duhet ta ndihmoj Mardoheun.'*

### **Piktura 3 - 2**

Mbretëresha e shqetësuar gjeti disa veshje të mira dhe i kërkoi një shërbëtori t'ja çonte Mardoheut. 'Thuaji t'i veshi,' urdhëroi ajo. 'Dhe të heqë tej rrobat prej thesi.'

Shërbëtori shpejtoi te Mardoheu. Por, kur tentoi t'i jepte rrobat, ai nuk i mori ato. Kështu, shërbëtori u kthye sërish te Esteri.

'Oh, pse i ktheve mbrapsht? Pse nuk i mori Mardoheu?' pyeti mbretëresha e pikëlluar. Shërbëtori shpjegoi se Mardoheu kishte refuzuar pa dhënë shpjegime. Mbretëresha ndjeu se diçka nuk shkonte. Ajo duhej ta zbulonte atë.

### **Piktura 3 - 3**

Mbretëresha thirri Hathakun, një nga shërbëtorët e saj. 'Duhet doemos të shkosh te

Mardoheu për të mësuar se çfarë gjë e brengoste dhe për ç'arsye,' ishte urdhri i saj i prerë.

Hathaku shkoi me të shpejtë te Mardoheu dhe i dha atij mesazhin e mbretëreshës. Mardoheu u ndje i çliruar të dëgjonte që mbretëresha kishte dijeni për brengosjen e madhe të Judejve.

'Hathak, duhet t'i thuash mbretëreshës gjithçka. Unë refuzova të përkulesha para Hamanit. Ai u tërbua nga inati dhe urdhëroi që Judejtë të vriten. Madje, Hamani ka premtuar të paguajë një sasi të madhe parash në thesarin mbretëror. Ja, merre dhe çoja këtë mbretëreshës.'

### **Piktura 3 - 4**

Hathaku nuk u ndal të bënte pyetje.

Ai shkoi me të shpejtë në pallat, ku Esteri po priste me ankth. 'Mbretëresha Ester!' Hathaku filloi nxitimthi. 'Ka lajme shumë të këqija nga Mardoheu dhe nga gjithë Judejtë! Ata duhet të vdesin në ditën e trembëdhjetë të muajit të dymbëdhjetë. Ja, lexoje këtë. E dërgon Mardoheu.'

Teksa lexonte, fytyra e mbretëreshës mori një pamje të trishtuar. Hathaku pyeste veten pse. 'Mbretëresha Ester,' vazhdoi Hathaku. 'Ti duhet të shkosh te Mbreti Asuero e t'i lutesh që të mos vrasë gjithë Judejtë. Mardoheu thotë se ti duhet ta bësh këtë me doemos!'

'Ah, jo! Klithi mbretëresha -ajo ishte e tronditur dhe e frikësuar. Ajo e ndjente se kjo ishte diçka që ajo nuk guxonte ta bënte.

Nuk e di nëse Esteri harroi se Perëndia do t'i jepte asaj kurajë. Mos harroi ajo t'i paraqiste Atij problemet e saj? Nëse Zoti Jezus është shpëtimtari yt, atëherë ti je fëmija i Tij dhe ti mund t'i tregosh Atit tënd Qiellor frikën tënde. Tek Psalmet 50:15 ne lexojmë: 'Kërkomë ditën e fatkeqësisë, unë do të të çliroj dhe ti do të më lëvdosh.' Çfarëdo telashi qoftë - ndoshta shoku ndërpret miqësinë me ty, babai humb punën apo dikush të thotë gjëra të këqija - tregoja ato Atit tënd Qiellor. Ai do të të ndihmojë dhe ti do ta lavdërosh Atë. Mos harroni të flisni me Perëndinë për problemet tuaja kur keni frikë. Duket sikur Esteri e ka harruar këtë.

'Hathak,' tha ajo. 'Ti duhet të shkosh menjëherë te Mardoheu t'i japësh mesazhin. Çdokush e di se burri apo gruaja që i afrohet mbretit në kopshtin e brendshëm, pa u thirrur duhet të dënohet me vdekje. Jeton vetëm ai, të cilit mbreti i shtrin skeptrin e tij prej ari.'

Skeptri është një lloj shkopi që i përket mbretit. Shkopi tregon se ai ka pushtetin dhe të drejtën e sundimit.

'Ky është ligji,' vazhdoi Esteri. 'Dhe Hathak, thuajti Mardokeut se unë kam tridhjetë ditë që nuk jam thirrur për të shkuar te mbreti.'

Esteri po mendonte rreth problemeve dhe ato i dukeshin të pamundura. Por kur keni probleme të mëdha, mos harroni se Perëndia është shumë më i madh se problemet tuaja. Asgjë nuk është tepër e vështirë për Perëndinë. Ai është i gjithëfuqishëm. Ai bën çdo gjë që dëshiron. Ky është Perëndia, i cili është Ati juaj Qiellor, nëse Zoti Jezus është shpëtimtari juaj. Zoti i plotfuqishëm ishte edhe Zoti i Esterit. Por tani, ajo mendonte më shumë rreth problemeve të saj sesa rreth Tij.

Tek Hathaku kthehej me të shpejtë te Mardokeu, Esteri ndjente se kushëriri do ta kuptonte.

Hathaku e gjeti Mardokeun dhe i tha atij gjithçka që i kishte thënë mbretëresha. 'Ajo nuk është thirrur nga mbreti për tridhjetë ditë me radhë,' përfundoi Hathaku. Mesazhi i mbretëreshës nënkuptonte se ajo e kishte të pamundur të fliste me mbretin.

### **Piktura 3 - 5**

Por Mardokeu nuk tërhiqej lehtë. 'Hathak,' tha ai me zë të vendosur. 'Ti duhet t'i çosh këtë mesazh Esterit: Mos mendo se do të shpëtosh vetëm ti nga gjithë Judenjët, sepse ndodhesh në pallatin e mbretit. Sepse po të jetë se ti hesht në këtë moment, ndihma dhe çlirimi do të vijnë për Judejtë nga një anë tjetër; por ti dhe shtëpia e atit tënd do të shuheni. Përveç kësaj, kush e di nëse është pikërisht për një kohë të tillë që ti ke arritur në pozitë mbretërore?' Mardokeu donte që Esteri të mbante mend se Perëndia ka plane për fëmijët e Tij. A nuk ishte ajo në pallat sepse Perëndia e kishte planifikuar atë?

Kemi mësuar se Perëndia ka arsye për të shpëtuar çdo besimtar. Ai na ka vendosur në familje, në rrugë apo në shkollë për t'u përdorur nga Ai në një mënyrë të veçantë. Dikur ishte një djalë, me emrin Kolin, që jetonte diku në një rrugë të caktuar. Le ta quajmë atë Rruga e Urës. Ai ishte i krishterë. Një ditë në Rrugën e Urës erdhi një burrë e një grua për t'u takuar me fëmijët e kësaj rruge. Por ata nuk dinin ku jetonin fëmijët. Kur zbritën nga makina ata takuan Kolin. 'Ne do të bëjmë takime të veçanta me djemtë e vajzat. A na tregon ku banojnë fëmijët?' 'Sigurisht,' tha Kolin. Dhe ai i çoi ata nëpër shtëpitë ku jetonin fëmijët.

Kur mbaruan, burri i tha Kolit, 'Unë mendoj se Perëndia ka planifikuar që ti të jetosh në këtë rrugë. Duke qenë ti në këtë rrugë ne ishin në gjendje të ftonim fëmijët. Shumë

faleminderit. Kjo i dha Kolit një ndjenjë gëzimi kur mendoi se Perëndia kishte planifikuar vendbanimin e tij.

### **Piktura 3 – 6**

Kur u kthye në pallat, Hathaku i tregoi Esterit gjithçka. Ajo kishte frikë të madhe kur mendonte se do të shkonte te mbreti pa u thirrur. Por, ajo me kurajë vendosi të orvatej të shpëtonte popullin e vet, madje edhe sikur të humbte jetën e saj.

Ajo iu përgjigj Mardokeut, 'Mblidh gjithë Judejtë që ndodhen në qytet, dhe agjëroni për mua; rri pa ngrënë dhe pa pirë tre ditë. Edhe unë me vajzat e mia do të agjërojmë në të njëjtën mënyrë; pastaj do të hyj te mbreti dhe në qoftë se duhet të vdes, do të vdes.'

Esteri e dinte se ajo kishte nevojë për ndihmën e Perëndisë. Të rinj e të reja të krishterë, ti ke nevojë për ndihmën e Perëndisë gjatë gjithë kohës, apo jo? Ndoshta je i krishteri i vetëm në klasë dhe e ke të vështirë të jetosh për Perëndinë. Flitini Atit Qiellor për këtë. Ai do që ju t'i thoni gjithçka. Ai ju premton se do t'ju ndihmojë. Mund të ndodhë që në shtëpi të keni një problem që nuk mund t'ja thoni të tjerëve. Ju mund t'ia thoni problemin Perëndisë. Ai është i interesuar dhe Ai mund t'ju ndihmojë. Qofshin probleme të vogla apo të mëdha, bisedojini ato me Perëndinë. Mos harroni vargun Biblik, 'Kërkomë ditën e fatkeqësisë, unë do të të çliroj dhe ti do të më lëvdosh.' (Psalmëve 50:15) Perëndia është kaq i fuqishëm e kaq i madhërisëm sa s'ka asgjë të vështirë për Të. Ai dëgjon dhe iu përgjigjet lutjeve të fëmijëve të Tij.

Kjo është arsyeja pse Esteri e dinte se ajo dhe populli i saj duhet të kërkonin ndihmën e Tij.

Kur Mardokeu dëgjoji lajmin, ai qetë-qetë ju dërgoi fjalë Judejve. Ata agjëruan dhe u lutën për tre ditë. Oh sa nevojë kishin ata për ndihmën e Perëndisë!

Esteri nuk mund të largohej nga pallati të agjëronte e të lutej me të tjerët. Ajo thirri gjithë vajzat së bashku. Esteri po i kërkonte Perëndisë së vetme që ishte shumë më i fuqishëm se Mbreti Asuero dhe Hamani ndihmën e Tij.

Pas tre ditëve, Esteri veshi rrobat mbretërore dhe u drejtua nga kopshti i brendshëm i pallatit. Sa nervoze që ndjehej. Priti aty në brendësi të kopshtit. Zemra gati i pushoi së rrahuri. A do të vdiste ajo nga ky veprim? A do ta zgjaste mbreti skeptrin prej ari?

#### **Piktura 4 – 1**

Ajo po priste dhe vërente me frymë të marrë. Mbreti Asuero pa mbretëreshën e tij të bukur. Dora e tij lëvizi. Po, ai e zgjati skeptrin e tij të artë! Esteri mund të vinte të fliste me të!

Perëndia kishte dëgjuar thirrjen e popullit të tij! Ai gjithmonë i dëgjon fëmijët e Tij kur i flasin Atij. 'Kjo është siguria që kemi përpara tij: nëse kërkojmë diçka sipas vullnetit të tij, ai na e plotëson.' (1 Gjon 5:14) Ka raste kur Ai nuk bën atë që mendojmë ne se duhet të bëjë, por Ai gjithmonë bën atë që është më e mira. Ç'gjë e mrekullueshme të jesh fëmija e Perëndisë e të dish se Ai premtan të dëgjojë e t'u përgjigjet lutjeve tona, ashtu sikundër Ai iu përgjigj shumë kohë më parë popullit të vet.

Ç'i tha Esteri mbretit? Atë që tha ajo ishte habitshme! Por ne do të presim herën tjetër që të mësojmë gjithçka.

I ri dhe e re e krishterë, mos harroni kurrë se Ati juaj Qiellor dëgjon dhe iu përgjigjet lutjeve. A harxhoni çdo ditë kohë për të folur me Të? A ja tregoni Atij problemet tuaja? A i kërkonit Atij të shpëtojë shokët dhe familjen tuaj të cilët nuk e njohin Zotin Jezus? Duke përfunduar, le t'i

kërkojmë Perëndisë të na ndihmojë të lutemi. 'I dashur Ati ynë Qiellor, faleminderit që jeni Perëndi i madh që dëgjonit dhe u jepni përgjigje lutjeve tona. Të lutemi na fal që hera herës nuk flasim më Ty. Na ndihmo të lutemi për Ty çdo ditë. Në emër të Perëndisë, Amin'

# Mësimi Katër

## Nderohet Populli i Perëndisë

<b>Shkrimet e Shenjta:</b>	Ester 5 dhe 6
<b>E Vërteta Qendrore:</b>	Mos u bëj skllav i mëkatit sikundër ishte Hamani.
<b>Zbatimi:</b>	Për fëmijët e <b>pashpëtuar</b> : Besoni Zotin Jezus t'ju çlirojë
<b>Skica e Mësimi:</b>	Esteri fton mbretin dhe Hamanin në banket Hamani e raporton këtë me krenari VQP Esteri fton mbretin dhe Hamanin në një banket të dytë Mardokey refuzon të përkulet para Hamanit Zereshi dhe miqtë e tij e këshillojnë Hamanin të ndërtonte një trekëmbësh për Mardokeyn VQP Mbretin se zinte gjumi Shërbëtorët lexojnë me zë të lartë librin e ngjarjeve ku Mardokey zbuloi komplotin Mbreti pyeti Hamanin si mund të nderohet një njeri i tillë Hamani jep mendimin e vet VQP Mbreti zbaton sugjerimin e Hamanit Hamani e çon Mardokeyn me kalë nëpër rrugët e qytetit Hamani shkon në shtëpi i poshtëruar VQP

**Mjetet Vizive:** **Piktura 3-7 4-1 – 4-7**

**Vargu për t'u mësuar  
përmendësh:**

*'Nëse Biri ju çliron juve, ju do të jeni me të vërtetë të lirë.'*  
(Gjon 8:36)

### **Piktura 3 - 7**

Për të ilustruar realitetin si mëkati mbërthen fuqishëm jetën e njerëzve, mund të përdorni një **mësim praktik** pasi të keni shpjeguar vargun që duhet mësuar përmendsh. Kërkojini një djalë që të dalë para klasës e të mbajë duart të puçura me njëra tjetrën. (Mirë do të ishte sikur djali të vishte këmbë me mëngë të gjata apo një bluzë) Lidhni një spango rreth duarve të tij dhe bëjeni nyje. Kërkojini djalin: 'Këpute spangon.' Ai e bën atë me lehtësi

Thojini atij: 'Ja kështu është me një zakon mëkatar, si sharja, vjedhja dhe bixhozi. Por zakonet bëhen më të fuqishme.' (Kësaj radhe lidhni spangon rreth duarve të tij disa herë.) 'Ti thua një gënjeshtër, një tjetër dhe një tjetër. Ti vjedh një lodër, një biçikletë dhe pastaj para dhe ky zakon sa vjen e keqësohet. Ti fillon të luash bixhoz në një automat, të shkosh në bingo apo të vesh baste për kuajt, etj. Këto sa vijnë e forcohen. Dhe ç'ndodh në fund?

Thojini djalit: 'Dhe tani orvatu të këputësh spangon që është lidhur disa herë rreth duarve të tua. Natyrisht, që s'e bëni dot. Ashtu sikundër ti ke nevojë për mua të këpus spangon e lidhur rreth duarve të tua, ashtu çdokush prej nesh ka nevojë për Zotin Jezus Krisht të na çlirojë nga zakonet mëkatore që na mbajnë rob. Zoti Jezus vdiq në kryq për mëkatarët dhe u ngrit sërish të na çlirojë neve e të na japë fuqi të jetojmë për Të.'

## **Mësimi**

Edhe sikur të jetë gjysma e mbretërisë sime, do të të jepet.'

### **Piktura 4 - 1**

Me të shpejtë, mbretëresha lëvizi përpara dhe preku majën e skeptrit të artë. Mbreti Asuero pyeti, 'Çfarë do, mbretëreshë Ester?'

### **Piktura 4 - 2**

Përzemërsia e tij duhet ta ketë inkurajuar Esterin. 'Në qoftë se kështu i pëlqen mbretit,' tha ajo, 'Le të vijë sot mbreti me Hamanin në banketin që kam përgatitur.'

Çfarë kërkesë e çuditshme! Kjo nuk është ajo që ne prisnim t'i thoshte mbretit, apo jo? Ndoshta edhe mbreti nuk e priste një gjë të tillë! Mendoni të vinte jetën në rrezik për të ftuar mbretin në banket!

Dhe mbreti urdhëroi, 'Silleni shpejt Hamanin që të bëhet ç'ka thënë Esteri.'

#### Piktura 4 - 3

'Çfarë princi fatlum që jam,' mendonte Hamani tek ulej me krenari në banketin e mbretëreshës. 'Të pres sa këtë ta dëgjojë familja dhe miqtë e mi! Unë po madhërohem çdo ditë.'

Kush ishte njeriu më i rëndësishëm në jetën e Hamanit. Po, vetë Hamani. Ai e donte veten më shumë se këdo tjetër. Kur e doni veten më shumë se këdo tjetër kemi të bëjmë me mëkat, sepse Perëndia thotë, 'Ti do ta duash, pra, Zotin, Perëndinë tënd, me gjithë zemër, me gjithë shpirt dhe me tërë forcën tënde.' (Ligji i Përtërirë 6:5) Mëkati e vë veten të parë në jetën tuaj. Edhe kur jemi të rinj mund të ndodhë kjo. Askush nuk do t'ju mësonte ju, vëllanë apo motrën tuaj të hanit vetë gjithë çokollatën e të mos e ndanit me shokët. Ne kemi lindur të tillë që të vëmë veten para Perëndisë dhe njerëzve të tjerë. Kjo është pse fëmijët e vegjël duan të bëjnë sipas qejfit dhe qajnë kur nuk e arrijnë atë. Tek rritemi, ne bëhemi skllëvër të mëkatit. Skllavi është ai njeri që duhet të bëjë atë që i thotë i Zoti i tij. Ne lindim skllëvër të mëkatit. Mëkati ka kontrollin e vetes tonë, ashtu sikundër kishte kontrollin e Hamanit.

Ndërsa kalonte koha në banketin e mbretëreshës, Mbreti Asuero pyeti, 'Cila është kërkesa jote? Qoftë edhe gjysma e mbretërisë sime, do të bëhet.'

Dhe Esteri iu përgjigj, 'Në qoftë se kam gjetur hir në sytë e mbretit dhe në qoftë se mbreti i pëlqen të plotësojë kërkesën time dhe të më japë atë që kërkoj, le të vijë mbreti me Hamanin në banketin që unë do t'u përgatis atyre, dhe nesër kam për të bërë ashtu si ka thënë mbreti.'

Mbreti duhet të ketë mbetur i habitur. Hamani ishte i gëzuar të shkonte sërish në një banket mbretëror.

Hamani doli i krekosur nga pallati. Ai me zor priste të shkonte në shtëpi e t'i tregonte gjithçka gruas dhe miqve të tij lidhur me nderin që i ishte bërë atë ditë. Kur pa Mardokeun te porta e pallatit (*Vendosni figurën 42*), ai natyrisht nuk u përkul para princit krenar. Ndërsa kthehej në shtëpi, Hamani ishte gjithë vrer kundër Mardokeut.

#### Piktura 4 – 4

Menjëherë sa vajti në shtëpi, Hamani thirri miqtë dhe gruan e tij Zeresh. Ai u mburr për pasurinë e tij, për djemtë e tij dhe për pozitën e lartë që mbreti i kishte dhënë atij në mbretëri.

'Kjo nuk është e gjitha,' vazhdoi ai. 'Unë jam i vetmi njeri që Mbretëresha Ester ftoi të shkonte me mbretin në banketin e organizuar nga ajo vetë. Dhe ajo më ftoi mua të shkoj në një banket tjetër nesër.' Fytyra krenare e Hamanit u mjegullua nga inati teksa ai vazhdoi, 'Por gjithçka priset nga ai judeu, Mardokeu. Unë s'do jem i lumtur sa kohë që ai do të vazhdojë të shërbejë te porta e mbretit.'

Atëherë bashkëshortja e tij dhe gjithë miqtë e tij hodhën një ide: 'Të përgatitet një trekëmbësh i lartë pesëdhjetë kubitë. Nesër në mëngjes i thuaj mbretit që aty të varet Mardokeu.'

(*Një trekëmbësh është një strukturë druri e bërë nga shtylla pingule, që mbajnë një tra që zgjatet horizontalisht në krye. Mësues, ndoshta duhet të bëni një skicë të tij në një copë letër.*)

Ky mendim i pëlqeu Hamanit mizor dhe menjëherë përgatiti trekëmbëshin. Shumë shpejt Mardokeu nuk do ta shqetësonte më Hamanin.

Sa i keq që është mëkati! Hamani po i bënte të këqijat njëra pas tjetrës. Kjo ndodh kur mëkati është zot i jetës tuaj. Me kalimin e viteve ti vazhdon rrugën e paudhësive.

Dua t'ju tregoj për Alanin që e zbuloi shpejt këtë të keqe. Kur ishte në moshën tre-katër vjeçare, ai hera herës këpuste gënjeshtër, por i ati e dinte kur ai nuk thoshte të vërtetën. Por kur Alani mbushi nëntë vjeç, ai gënjente dhe askush nuk dyshonte. Jo vetëm kaq, kur ishte nëntë vjeç përdorte një gjuhë fyese që se mendonte kurrë se mund ta përdorte më parë. Mëkati ishte bërë zot i tij dhe kishte marrë kontrollin e jetës së tij. Kjo është njëllë më të gjithë djemtë e vajzat që rriten. Mos thoni, 'Po, duhet doemos të mos mëkatoj më.' Ju s'mund të ndaloni mëkatimin e të filloni një jetë të përsosur. Ju keni nevojë për dikë më të fuqishëm se mëkati për t'ju shpëtuar nga kjo e keqe e madhe. Dhe këtë mund ta bëjë vetëm Zoti Jezus Krisht. Ai vdiq i kryqëzuar në kryq të shpëtojë njerëzit nga mëkati, jo vetëm nga ndëshkimi për mëkatin por edhe nga pushteti i mëkatit. Ai sot është i gjallë dhe është i Vetmi që mund t'ju çlirojë nga kthetrat e mëkatit që kanë mbërthyer jetën tuaj. Nëse ke besim tek Ai, Ai do ta bëjë këtë për ty. Bibla thotë, 'Ai do të shpëtojë popullin e vet nga mëkatet.' (Mateut 1:21) Dhe kështu Ai do të marrë në dorë jetën tënde dhe ti s'do jesh më skllav i mëkatit. Mund të jetë që ti me të vërtetë



dëshiron që Zoti Jezus ta bëjë këtë për ty. Ndoshta ti nuk di si t'i kërkosh Atij që të të shpëtojë. Unë do të gëzohesha të të tregoja këtë nga vetë Bibla. Ka rëndësi të dimë pse kemi nevojë për Zotin Jezus të na shpëtojë, çfarë duhet të bëjmë dhe çfarë premton Ai të bëjë. Nëse kërkoni që të të shpjegoj më qartë, ti do të më gjesh mua (*çaktoni vendin*) në fund të mësimit. Thjesht eja e më thuaj: 'Unë dua të di më shumë për mënyrën e shpëtimit.' Mos harro se ti je skllav i mëkatit sikundër ishte Hamani. Atë natë mendja e tij ishte gjithë mendime të këqija.

#### **Piktura 4 - 5**

I kthyer në pallat, Mbretin Asuero nuk e zinte gjumi. Ajo natë dukej e pafund. Ishte ndonjë fatkeqësi që nuk e linte Mbretin Asuero ta zinte gjumi? (*Jo*) Ç'kishin bërë Esteri, Mardokeu dhe judejtë e tjerë? (*Ata ishin falur*) Cili ishte ai që e mbante Asueron zgjuar? (*Ishte Perëndia*) Më në fund, mbreti i kërkoi shërbëtorëve t'i sillnin librin ku shënohej gjithçka që ndodhte gjatë kohës së mbretërimit të tij.

Një shërbëtor nisi të lexojë me zë. Ai arriti te komploti për vrasjen e mbretit dhe si Mardokeu e kishte zbuluar atë.

'Çfarë nderimi dhe shpërblimi iu dha Mardokeut për këtë?', pyeti mbreti.

Dhe shërbëtori iu përgjigj, 'Nuk u bë asgjë për të.'

'Si? Asnjë shpërblim?' Kjo s'duhej të ndodhte kurrë në oborrin Persian. Është turp që Mardokeu nuk ishte shpërblyer. Mbreti vendosi aty për aty të bëjë diçka për Mardokeun. Por çfarë?

Në atë çast mbreti dëgjoi dikë të ecte në kopsht. 'Kush është në kopsht,' pyeti ai.

'Hamani është në kopsht,' iu përgjigj shërbëtori.

'Lëreni të hyjë,' urdhëroi mbreti. Hamani ishte tamam njeriu që do ta ndihmonte atë për planin e tij.

Ne e dimë pse Hamani ishte atje kaq shpejt, apo jo?

'Çfarë duhet t'i bëhet një njeriu që mbreti dëshiron ta nderojë?', pyeti Mbreti Asuero.

Menjëherë Hamani mendoi me vete, 'Cilindo të donte të nderonte mbreti më shumë se mua?' Sërish ai po mendonte për vete. Kur mëkati është në zotërim të jetës tuaj, ju nuk mund të mendoni ashtu sikundër do Perëndia. Bibla thotë se djalli ka 'verbuar mendjet e atyre që nuk besojnë.' (2 Korintasve 4:4) Kjo do të thotë se çdokush që nuk e ka Zotin Jezus si Shpëtimtarin e tij e ka mendjen të verbuar nga djalli. Ndoshta dhe ju jeni i tillë: ju nuk shqetësoheni se bëni keq sa kohë që nuk

kapeni. Ju mendoni se Bibla është e mërzitshme. Ju jeni personi më i rëndësishëm në mendjen tuaj. A nuk tregon kjo shkallën tuaj të skllavërimit nga mëkati dhe nevojën e madhe për Zotin Jezus t'ju çliroje juve nga kjo skllavëri? A jeni skllav? Hamani ishte. Ai mendonte vetëm për vete. Natyrisht, ai kishte mendime të pafund si mbreti duhej të nderonte atë!

'Për njeriun që mbreti dëshiron të nderojë,' sugjeroi ai, 'të merret rroba mbretërore që ka veshur mbreti dhe kali mbi të cilin ka hipur mbreti dhe të vihet mbi kokën e tij një kurorë mbretërore. T'i dorëzohet rroba dhe kali njerit prej princave më fisnikë dhe t'i vishen rrobat njeriut që mbreti dëshiron të nderojë; pastaj të çohet me kalë nëpër rrugët e qytetit dhe të shpallet para tij: Kështu veprohet me njeriun që mbreti dëshiron të nderojë!'

Mbreti dukej i kënaqur me mendimet e Hamanit. 'Shpejto merr rrobën dhe kalin, siç e the, dhe vepro kështu me judeun Mardoke, që rri ulur pranë portës së mbretit, mos lër pa kryer asgjë nga ato që ke thënë.'

'Mardokeut! A tha mbreti për Mardokeun?' Hamani me zor u besonte veshëve. A duhet të bënte ai të gjithë ato për Mardokeun -armikun e tij? Po, ai e dinte se duhej t'i bënte sepse fjala e mbretit ishte ligj. Pra, duke menduar se po shihte një ëndërr të keqe, Hamani u largua nga dhoma e mbretit për të kryer detyrën e urryer.

#### **Piktura 4 – 6**

Ai i veshi Mardokeut rrobën e mbretit dhe i mbajti atij kalin e mbretit që të hipte Mardokeu.

Dhe pastaj e çoi me kalë nëpër rrugët e Shushanit, duke shpallur pranë tij: 'Kështu veprohet me njeriun që mbreti dëshiron të nderojë!'

Njerëzit shikonin me habi. Sa duhet ta ketë urryer Hamani atë çast! Kur mbaroi shëtija me kalë, Mardokeu shkoi në punën e tij te porta e mbretit.

Hamani vari kokën nga turpi dhe nxitoi te kthehet në shtëpi. I pikëlluar Ai i tregoi bashkëshortes dhe gjithë miqve të tij të gjitha sa kishin ngjarë, duke bërë të dështonin planet e tij.

Ata e dëgjuan por nuk i ofruan shumë qetësi.

Ata i thanë Hamanit, 'Në qoftë se Mardokeu para të cilit ke filluar të biesh është nga fisi i Judejve, ti nuk do të arrish të fitosh kundër tij, por do të rrëzohesh plotësisht para tij.' Ç'fjalë të tmerrshme! Ja ku e çoi shpirtligësia dhe mëkati Hamanin. Mëkati është zot mizor e i paskrupullt. Bibla thotë, 'Veprimi i të pabesëve është i dëmshëm.' (Fjalët e Urta 13:15)

Për një farë kohe kur jeni në pushtetin e mëkatit duket sikur po e kaloni për mrekulli. Por mëkati ju ndan nga Perëndia. Ai ju shkatërron jetën. Rruga mëkatore është rrugë e vështirë. Në fund, mëkati do t'ju mbajë larg Perëndisë për jetë. Mos u bëj më skllav i mëkatit.

#### **Piktura 4 - 7**

Zoti Jezus vdiq për të çliruar njerëzit nga ndëshkimi dhe pushteti i mëkatit. Besojeni sot atë ta bëjë atë për ju. Ju mund t'i thoni Atij: 'I dashur Zoti Jezus, deri më tani unë kam lejuar mëkatin të drejtojë jetën time. Faleminderit që vdiqe e u ringjalle sërish që të më shpëtosh mua nga mëkati. Të kërkoj të më shpëtosh tani dhe të marrësh në duar jetën time.' Dëgjoni këto fjalë që ka thënë Zoti Jezus: 'Pra, nëse Biri do t'ju bëjë të lirë, do të jeni me të vërtetë të lirë.' (Gjoni 8:36)

# Mësimi Pesë

## Esteri Lutet për Popullin e Saj

<b>Shkrimet e Shenjta:</b>	Ester 6:14; 7:1-10; 8:3-6; 8:8-14 Psalmet 73
<b>E Vërteta Qendrore:</b>	Perëndia gjithmonë i mund armiqtë e tij
<b>Zbatimi:</b>	Për fëmijët e <b>pashpëtuar</b> : Sigurohuni që të mos jeni armik i Perëndisë. Për fëmijët e <b>shpëtuar</b> : Kur shihni keqbërësit që kanë sukses, mos kopjoni udhën e tyre mëkatore, por besoni Perëndinë.
<b>Skica e Mësimi:</b>	Hamani dhe mbreti në banket VQ Esteri i kërkon mbretit të shpëtojë popullin e vet Esteri tregon Hamanin si njeriun fajtor VQP Mbreti largohet nga banketi Hamani i lutet Esterit Mbreti kthehet Mbreti urdhëron vdekjen e Hamanit Hamani varet në trekëmbësh VQP Esteri lutet për popullin e saj Mbreti: 'Shkruani një dekret tjetër' VQP Dekreti çohet te judenjtë VQP
<b>Mjetet Vizive:</b>	<b>Pikturë 5 – 1 - 5 - 7</b>
<b>Vargu për t'u mësuar përmendësh:</b>	<i>'Duke hedhur mbi të gjithë merakun tuaj sepse ai kujdeset për ju.'</i> 1 Pjetrit 5:7

## Mësimi

### Piktura 5 – 1

Sa shpejt ndryshuan gjërat! Hamani ndjehej i lumtur, krenar dhe i vetë-sigurt. Tani edhe pse ai ishte në banketin e mbretëreshës, ai ndjehej i mjerë, i vogël dhe i pasigurt për veten.

Këto ndryshime erdhën për arsye që Hamani nuk i njihte fare. Ai nuk dinte gjë për lutjet e Judejve ndaj Perëndisë për shpëtimin e tyre. Ai nuk njihte Perëndinë e vërtetë që sundonte mbi të gjithë. Hamani ishte armiku i Judejve, dhe ai nuk e dinte se për këtë arsye ai ishte edhe armiku i të madhit dhe plotfuqishmit Zot. Ata që shkojnë kundër Perëndisë dhe rrugës së tij do të mposhten. Bibla thotë se Perëndia 'do të triumfojë mbi armiqtë e tij (Isaia 42:13).

Kjo do të thotë se ai do të triumfojë mbi ta. Perëndia do të fitojë. Disa nga armiqtë e Perëndisë kanë pushtet të madh, por Perëndia ka gjithë pushtetin. Ai nuk mundet kurrë nga ata që janë kundër tij. Kështu, që edhe Hamani do të mundet me siguri.

Ndoshta, Hamani po mendonte si punët morën për keq. Esteri po mendonte për Mardokeun dhe popullin e saj dhe si asaj i duhej të vdiste me ta në ditën e trembëdhjetë të muajit të dymbëdhjetë. Ajo e dinte se duhej të fliste me mbretin për këtë. Ajo kishte dhënë fjalën.

Në ditën e dytë të banketit të mbretëreshës, mbreti pyeti, 'Cila është kërkesa jote, o mbretëreshë Ester? Do të plotësohet. Çfarë kërkon? Edhe sikur të jetë gjysma e mbretërisë sime, do të bëhet.'

Mbreti priste përgjigjen e mbretëreshës. A do të kërkonte ajo xhevahire, para, tokë apo

nderim? Zakonisht, njerëzit kërkonin gjëra të tilla. Esterit po i rrihte zemra, por ajo ishte i sigurt se ishte momenti që ajo të fliste. 'Në rast se kam gjetur hir në sytë e tu, o mbret, dhe në qoftë se kështu i pëlqen mbretit, kërkesa ime është që të më jepet jeta; dhe kërkoj që populli im të falet.'

Si? Jeta e mbretëreshës në rrezik? Si mund të ndodhë kjo? Mbreti mezi u besonte veshëve të tij! Dhe mos harroni se Mbreti Asuero nuk e dinte se Hamani do të shkatërronte Judejtë. Dhe natyrisht, ai nuk e dinte se Esteri ishte njëra prej tyre.

Esteri vazhdoi me kurajë, 'Unë dhe populli im kemi qenë të shitur për t'u vlarë dhe për t'u shfarosur.

Gjithë kombi ynë do të shfaroset. Po të ishim shitur për t'u bërë skllëvër dhe skllave do të kisha heshtur.'

'Kush është dhe ku ndodhet ai që ka guximin të bëjë një gjë të tillë?' kërkonte mbreti.

Mbretëresha guximtare u përgjigj, 'Armiku është i keqi Haman.'

## **Piktura 5 – 2**

Armiku u cilësua me emër në prani të vetë mbretit! Perëndia po sillte shkatërrimin e një armiku. Gjithçka dukej se po shkonte mirë për Hamanin për një farë kohe, por për aq kohë sa e lejoi Perëndia. Sot është e njëjta gjë. Ka raste kur njerëzit që nuk i binden Perëndisë nuk duken të ndëshkohen. Duket se gjithçka shkon mirë për ta. Kjo është se vetë Perëndia e lejon këtë. Një ditë, çdo armik i Perëndisë do të mposhtet dhe ndëshkohet. Do të ishte një kompromentim i madh i emrit të Perëndisë nëse armiqtë do ta mposhtin atë. Por Ai s'do ta lejojë kurrë këtë. Pra, kur shihni një mashtrues apo shantazhist që po ecën mirë, mos u bëni ziliqarë. Mos veproni sikundër veprojnë ata. Besoni Perëndinë, sepse në analizë të fundit armiqtë e Perëndisë do të humbin. Kjo ndodhi edhe me Hamanin.

Ai nuk nxirri asnjë fjalë. Ai ishte tmerruar. Ç'gabim kishte bërë kur u orvat të shkatërronte Judejtë kur mbretëresha ishte njëra syresh.

## **Piktura 5 - 3**

Mbreti u ngrit shumë i zemëruar, doli nga salla e banketit dhe shkoi në kopshtin e pallatit. Në kokën e tij kishte mendime të ndryshme zemërimi. Hamani, dikur një princ krenar ishte kthyer tani në një frikacak të frikësuar.

Në shpirt, ai e dinte se ç'kishte vendosur mbreti për të, por ai vendosi të bëjë një

përpjekje të pashpresë për të shpëtuar jetën e tij.

Ai u çua t'i lutej Esterit t'i shpëtonte jetën. Tek i lutej asaj, ai u përgjunj në këmbë mbi divan.

Pikërisht në atë çast, mbreti i inatosur u kthye dhe pa Hamanin me mbretëreshën. Ai u tërbua nga inati dhe i bërtiti Hamanit. Shërbëtorët e dinin se ç'donte të thoshte ajo. Ata me të shpejtë e mbuluan Hamanin e keq. Kjo ishte shenja që Hamani ishte dënuar me vdekje.

Një shërbëtorët e mbretit dukej se e dinte ndërtimin e trekëmbëshit nga Hamani. Ai tha para mbretit: 'Ja në shtëpinë e vetë Hamanit është ngritur një trekëmbësh, i lartë 50 kubitë, që Hamani kishte përgatitur për Mardokeun, i cili kishte folur për të mirën e mbretit.'

Mbreti urdhëroi: 'Vareni aty këtë!' Dhe shërbëtorët vepruan pa humbur kohë.

Ata e nxorën Hamanin nga pallati. Tani s'kishte më shërbëtorë që përkuleshin dhe as ecje krenare. Hamanin e varën në trekëmbësh në shtëpinë e tij, në trekëmbëshin që ai kishte ndërtuar për Mardokeun. Armiku i Perëndisë dhe i popullit të Tij vdiq.

Perëndia gjithmonë mund armiqtë e tij. Por jo gjithmonë ndodh kështu. Ka raste kur Perëndia lejon armiqtë e Tij të ecin në rrugën e tyre për një farë kohe. Njerëzit që nuk i binden Perëndisë duken sikur nuk kanë probleme. Ndoshta, në shkollën tuaj ndodhet një djalë që kopjon në provime, vjedh në dyqane, përdor emrin e Perëndisë si sharje dhe gjithçka atij i shkon për mrekulli. Ti je i krishterë dhe edhe pse punon shumë nuk arrin rezultate të tilla në provim. Disa nga shokët vendosin të të braktisin si shok, sepse ti je i krishterë. Është shumë e vështirë ta kuptosh. Mos nis paudhësitë thjesht sepse duket një gjë e lehtë. Mendo sa gjë e mrekullueshme është t'i përkasësh Perëndisë. Mos harro se ata që nuk i binden Perëndisë dhe kalojnë pa telashe në jetë s'do ta kenë gjithmonë kështu. Kurse ju do të jeni gjithmonë me Perëndinë. Armiqtë e Perëndisë, djalli, demonët dhe gjithë njerëzit që kanë qenë kundër Perëndisë do të mposhten dhe ndëshkohen për jetë. Është gjë serioze të jesh armik i Perëndisë sikundër ishte Hamani.

Tani Hamani vdiq. Esteri do të jetë jashtë rrezikut në ditën e trembëdhjetë të muajit të dymbëdhjetë. Mbreti do ta mbrojë atë. Por, populli i Esterit ishte ende në rrezik! Sipas ligjit të vjetër Persian urdhri i vjetër i mbreti duhet të

qëndronte në fuqi. Duhej një urdhër tjetër nga mbreti që të zëvendësonte urdhrin e vjetër. Urdhri për t'i shkatërruar Judejtë ishte shpërndarë në gjithë mbretërinë. Madje, shumë Persianë do të gëzoheshin të vrisnin Judejtë e t'u merrnin shtëpitë, tokën dhe paratë. Ç'duhet bërë për t'i shpëtuar ata?

#### **Piktura 5 – 4**

Edhe një herë me guxim Esteri i afrohet mbretit.

Mardoheu ishte me të kur ajo ra në këmbët e mbretit dhe iu lut atij t'i jepte fund planit të poshtër të Hamanit. Sërish mbreti zgjati majën e skeprit të artë drejt saj.

#### **Piktura 5 - 5**

Esteri u ngrit dhe qëndroi para mbretit. Ajo tha, 'Në se i duket mirë mbretit, në rast se kam gjetur hir në sytë e tij, në rast se çështja i duket gjithashtu e drejtë mbretit dhe në rast se gjej pëlqim në sytë e tij, të shkruhet për të revokuar dokumentet e hartuara nga Hamani. Si do të mund të rezistoj në fakt duke parë fatqësinë që do të godiste popullin tim? Si do të mund të rezistoj duke parë shkatërrimin e fisit tim?'

Mbretëresha guximtare po priste përgjigjen e mbretit. 'Shkruani një dekret tjetër,' i tha ai Esterit dhe Mardoheut. 'Shkruajeni atë në emër të mbretit në favor të Judejve si t'ju duket më mirë dhe vuloseni me unazën mbretërore, sepse vendimi i shkruar në emër të mbretit dhe i vulosur me unazën mbretërore është i prerë.'

#### **Piktura 5 – 6**

Sa u gëzuan Esteri dhe Mardoheu. Ata kishin shpresuar se do të ndodhte një gjë e tillë. Perëndia nuk do të linte që planet e Hamanit të kishin sukses. Armiqtë e Perëndisë dhe armiqtë e popullit të tij do të munden. Duhet të pyesim veten, 'Cilët janë armiqtë e Perëndisë?' Po, njerëzit e këqij, djalli dhe demonët janë armiqtë e Perëndisë. Por dëgjoni se ç'thotë Zoti Jezus 'Kush nuk është me mua, është kundër meje.' (Mateu 12:30) Kjo do të thotë se çdokush që nuk e ka besuar Zotin Jezus si Shpëtimtarin e tij është kundër Perëndisë dhe Birit të Tij, Zotit Jezus. Siç e dini ne të gjithë kemi lindur që të dalim kundër

Perëndisë. Por Perëndia ka hapur udhën për ne që të bëhemi miqtë e tij. Kur Zoti Jezus Krisht vdiq i kryqëzuar, e bëri këtë për të hequr rebelimin dhe urrejtjen ndaj Perëndisë. Ai mori ndëshkimin për gjithë mëkatet tona. Nëse ne nuk i besojmë Jezus Krishtit, ne mbetemi armiq të Perëndisë dhe vihem në luftë kundër tij. Mendoni me kujdes se në cilën anë qëndroni. Mos harroni se të gjithë ata që janë kundër Perëndisë do të munden dhe ndëshkohen për jetë. Por në se i kërkonit Zotit Jezus të jetë Shpëtimtari juaj, mes jush dhe Perëndisë do të ketë paqe. Ti do të jesh në anën e Perëndisë, do të jesh miku dhe jo armiku i Tij. Po ta keni bërë këtë, jam i sigurt se do të jeni shumë të gëzuar, ashtu sikundër Judejtë gëzoheshin me Zotin si Perëndinë e tyre.

Esteri, Mardoheu dhe sekretarët mbretërorë filluan pa humbur kohë nga puna. Mbretëresha dhe kushëri i saj treguan kujdes të veçantë në shkrimin e ligjit të ri, sepse ai ishte një ligj shumë, shumë i rëndësishëm.

Në ligjin e ri u jepej Judejve e drejta të bashkoheshin e të mbronin jetën e tyre kundër sulmeve në ditën e trembëdhjetë të muajit të dymbëdhjetë. Atyre u jepej e drejta të vrisnin çdo armik që do t'i sulmonte ata për t'u marrë pasurinë e tyre.

Urdhrat u shkruan me kujdes dhe u vulosën me unazën e mbretit. Kalorësve iu dhanë kuajt më të mirë, kuajt të shpejtë që ishin rritur posaçërisht për mbretin.

#### **Piktura 5 - 7**

A do të shpëtoheshin njerëzit e Perëndisë? Këtë do ta mësojmë herën tjetër. Por ju duhet të pyesni veten, 'A i përkas unë Perëndisë, apo po luftoj kundër Tij?' A e ndjeni në zemrën tuaj se jeni kundër Perëndisë? A dëshironi të jeni njëri nga njerëzit e Tij? A doni paqe dhe jo luftë me Perëndinë? Bibla thotë se Zoti Jezus Krisht 'bëri paqe me anë të gjakut të kryqit të tij.' (Kolozianëve 1:20) Ai vdiq në kryq për të bërë paqe mes mëkatarëve dhe Perëndisë. Nëse e doni me të vërtetë këtë paqe, besoni Zotin Jezus që t'ju rregullojë me Perëndinë. Thojini Zotit Jezus që tani, 'Zoti Jezus, më fal që kam luftuar kundër Perëndisë. Faleminderit që vdiqët për mua. Të lutem më fal dhe sillmë paqe mes meje dhe Perëndisë. Të lutem më bëj njërin prej fëmijëve të Perëndisë.'

# Mësimi Gjashtë

## Populli i Perëndisë Del fitimtar

<b>Shkrimet e Shenjta:</b>	Ester 8:1, 2, 7, 11-15; 9:1-17; 10:1-3
<b>E Vërteta Qendrore:</b>	Perëndia e do popullin e Tij në një mënyrë të veçantë dhe kujdeset për të.
<b>Zbatimi:</b>	Për fëmijët e <b>pashpëtuar</b> : Ju do të njihni dashurinë dhe përkujdesjen e Tij kur të besoni Krishtin si Zotin dhe Shpëtimtarin tuaj, pra kur të bëheni një nga njerëzit e Perëndisë. Për fëmijët e <b>shpëtuar</b> : Besojeni Atë gjatë gjithë kohës.
<b>Mësimi:</b>	Esteri dhe Mardoheu në pallat VQP Judejtë festojnë VQSH Një vizitë në një fshat:- Persianët krenarë, Judejtë të frikësuar VQSH Një kalorës vjen me një dekret Judejtë gëzohen Arrin dita e trembëdhjetë e muajit dymbëdhjetë:- Vdesin shumë Persianë  VQSH  Të gjithë Judejtë janë jashtë rrezikut Dita e katërbëdhjetë -ditë gëzimi për Judejtë Mardoheu dhe Esteri u thonë Judejve të mbajnë mend VQSH, P
<b>Mjetet Vizive:</b>	<b>Pikturë 6 – 1 - 6 - 7</b>
<b>Vargu për t'u mësuar përmendësh:</b>	<i>Përsëritni 1 Pjetri 5:7</i> <i>'Duke hedhur mbi të gjithë merakun tuaj sepse Ai kujdeset për ju.</i>

### Mësimi

Ata ishin shumë të gëzuar! Natyrisht, Esteri dhe Mardoheu duhet të ishin njerëzit më të gëzuar të pallatit. Por një pyetje mund t'ju lindë me të drejtë në mendjen tuaj. Ju pyesni, 'Si arriti Mardoheu në pallat? A nuk e kishte vendin e tij te porta e pallatit?'

Kur Esteri foli me mbretin, ajo i tha atij se Mardoheu ishte kushëriri i saj. Kur mbreti dëgjoji këtë, ai e solli Mardoheun në pallat. Madje, ai hoqi unazën e tij (atë që i kishte dhënë Hamanit) dhe ia dha atë Mardoheut. Ai natyrisht dukej se kishte besim te kushëriri i mbretëreshës.

Ai kishte treguar më shumë dashamirësi për Esterin. Ditën që u var Hamani, ai i dha asaj shtëpinë, tokat dhe shërbëtorët që kishte pasur Hamani.

### Piktura 6 – 6

Sa mrekullisht Perëndia u kujdes për Esterin dhe Mardoheun. Shumë gjëra u kujtonin atyre dashurinë e Tij. Bibla e bën të qartë se Perëndia i do të gjithë njerëzit e tij dhe kujdeset për ta në një mënyrë të veçantë. Ai thotë, 'Të kam dashur me një dashuri të përjetshme.' (Jeremia 31:3) Dashuria e Perëndisë për fëmijët e Tij s'ka fund. Kur mendojmë për këtë shohim se ka shumë gjëra që tregojnë dashurinë e tij. Por vdekja e Zotit Jezus në kryq na tregon qartë më shumë se çdo gjë tjetër dashurinë e Perëndisë. 'Sepse Perëndia e deshi aq botën, sa dhe Birin e tij të vetëmlindurin, që, kushdo që beson në të, të mos humbasë.' (Gjoni 3:16) Esteri dhe Mardoheu nuk mund ta mendonin këtë, sepse ata jetuan para se të vinte Zoti Jezus. Por ne

mund ta mendojmë atë. A e ke kuptuar se Zoti Jezus ka vdekur për mëkatet e tua? A i ke besuar Atij si Shpëtimtarit tënd? Nëse po, ti ke arritur të njohësh dashurinë e mrekullueshme të Perëndisë për ty. Kjo dashuri nuk mbaron kurrë. Ai kujdeset për ty dhe gjithë popullin e Tij në një mënyrë të veçantë.

Ne kemi mësuar së bashku gjatë këtyre ditëve veprimet e Perëndisë nëpërmjet Esterit. Ndoshta në shpirt ti dëshiron ta njohësh atë si Zotin dhe Shpëtimtarin tënd. Unë nuk mund të të shpëtoj ty, por mund të të shpjegoj si Zoti mund të të shpëtojë. Nëse dëshiron ndihmën time, qëndro në klasë, në radhën e parë, pasi të tjerët të kenë ikur. Nëse të shoh të ulur aty, do të jem i gëzuar të të tregoj nga Bibla rrugën e shpëtimit të Zotit.

Zoti i tregoi Mardokeut dhe Esterit se Ai po kujdesej për popullin e Tij.

#### **Piktura 6 – 4**

Shihet Mardokeu tek largohet nga pallati. Ai s'është i veshur me rroba thesi. Madje, ai s'ka veshur as rrobat e shërbëtorit.

Në kokë mbante një kurorë prej ari. Ai ishte veshur me rroba me ngjyrë të kaltërt e të bardhë, me një mantel prej pëlhure liri me ngjyrë të kuqe flakë -veshja mbretërore e pallatit. Mardokeu doli në rrugët e Shushanit.

Judejtë po festonin. Ata ishin të parët që dëgjuan lajmin e dërguar nga Esteri dhe Mardokeu. Ata nuk kishin më frikë nga ajo që mund të ndodhte në ditën e trembëdhjetë të muajit të dymbëdhjetë. Perëndia ishte me ta. Ai dëgjoji lutjet e tyre dhe i shpëtoi nga armiku. Perëndia nuk u kujdes vetëm për Esterin dhe Mardokeun. Ai u kujdes për gjithë popullin e tij: për të pasurit, të varfrit, të rinjtë dhe pleqtë. Dhe Ai është njëlloj edhe sot.

Nëse Zoti Jezus është Shpëtimtari yt dhe ke arritur të njohësh dashurinë e tij për ty, ji i sigurt se Ai kujdeset për ty. Ndoshta mësuesi në klasë nuk të tregon shumë vëmendje. Ndoshta, shokët të kanë braktisur dhe askush nuk dëshiron të të dëgjojë. Mund të jetë edhe më keq. Dikush në familjen tuaj sëmuret rëndë. Ndoshta, nëna apo babai të ka vdekur. Dhe t'i pyet veten, 'A ka njeri që kujdeset për mua?' Perëndia kujdeset dhe për këtë të jeni i sigurt. Ai di gjithçka për ty. Ai interesohet për ty. Ai kujdeset për ty gjatë gjithë kohës, madje edhe kur je në gjumë, Ai është duke u kujdesur për ty. Kur je i vetmuar, i mërzhitur apo i trishtuar, mos harro, Perëndia të do dhe kujdeset për ty, ashtu sikundër Ai u kujdes për popullin e Tij në mbretërinë e madhe Persiane shumë kohë më parë.

Por, mijëra Judej që banonin në vende të largëta ende nuk kishin marrë lajmin. Ata ende ishin të brengosur, të trishtuar e të frikësuar. Atje nuk shihje Judej në rrugë. Ata ishin fshehur në shtëpitë e tyre.

Shikoni si qeshin e bisedojnë Persianët. Njëri prej tyre po tregon një shtëpi të mirë që është pronë e një Judei. 'Kjo do të bëhet e imja,' mund të dëgjohej ai të flasë. 'Kjo do të jetë e imja kur të shfarosim Judejtë.' Ata shkojnë poshtë rrugës, duke qeshur e biseduar sa të pasur do të bëhen në ditën e trembëdhjetë të muajit të dymbëdhjetë.

Pa shiko! Diçka po ndodh atje poshtë rrugës. Të gjithë janë të entuziazmuar. Në fshat ka ardhur një kalorës dhe ai duket me shumë ngut. 'Edhe ndonjë lajm i keq tjetër për Judejtë!' Thotë dikush dhe ata të gjithë qeshin.

Ja tek vijnë disa Judej. Sa të frikësuar e të përmbajtur që duken. Persianët pushuan së qeshuri, madje disa prej tyre duken të inatosur. 'Dhe tani, ç'i thoni kësaj?' shqiptoi njëri prej Judejve.

'Ky mesazh është për ne dhe duket të jetë lajm i mirë!'

'Zor se mund ta besoj,' iu përgjigj tjetri. 'Por, ai ka vulën e mbretit.'

'Po si i bëhet dekretit të parë të mbretit? Ai nuk mund të ndryshohet,' tha një tjetër.

'Shiko, aty thuhet se ne mund të luftojmë për jetën tonë në ditën e trembëdhjetë të muajit të dymbëdhjetë. Në fund të fundit, ne s'do vdesim!'

Perëndia po kujdesej për popullin e Tij kur ata jetonin mes njerëzve që nuk e njihnin dhe nuk e donin Atë. Kjo është njëlloj edhe sot. Ndoshta ti je i vetmi i krishterë në familje, në klasë apo në grupin e lojës. Mund të ndodhë që në shtëpi të ketë shpesh zënka. A ka raste kur mendoni, 'Kjo është tepër e rëndë, unë nuk mund të jetoj për Perëndinë këtu.' Perëndia kujdeset për ty dhe u jep ndihmën që u lipset për të jetuar për Të. Ai do që ti të ndash problemet më Të. Në Bibël Ai thotë, 'Duke hedhur mbi të gjithë merakun tuaj sepse Ai kujdeset për ju.' (1 Pjetër 5:7) Të jini të sigurt se dashuria e tij e mrekullueshme dhe kujdesi i Tij për ty nuk shtron kurrë. Duke ditur këtë ju do të ndjeheni të gëzuar edhe atëherë kur gjërat janë shumë të vështira. Judejtë po gëzoheshin për atë që po ndodhte.

Kudo që përhapej lajmi, tek Judejtë shihej gëzim dhe kënaqësi e madhe. Ata organizonin bankete festive. Bibla thotë se disa nga banorët e vendit u bënë Judej, sepse tmerri i Judejve i kishte zënë.

Po, çdo të ndodhë në ditën e trembëdhjetë të muajit të dymbëdhjetë?

### **Piktura 6 – 2**

Më në fund erdhi dita kur Judejtë nuk kishin më frikë. Ata u bashkuan për të mbrojtur veten dhe pronat e tyre. Ata e dinin shumë mirë se kishin armiq që ishin të etur për të marrë shtëpitë dhe tokat e tyre.

Judejtë ishin gati me shpatat e tyre, por ata nuk kishin ndërmend të luftoni nëse nuk sulmoheshin.

Shumë Persianë kishin frikë të sulmonin. Gjithkund mbizotëronte një frikë e madhe nga Judejtë. Madje, edhe sundimtarët e provincave ndihmuan Judejtë, sepse ata e kishin dëgjuar sa i fuqishëm ishte bërë Mardokey në pallat.

Por, natyrisht kishte shumë Persianë që sulmuan për të marrë pronat e Judejve. E dini si shkoi puna e tyre? Ata u mundën, sepse Perëndia ishte me popullin e Tij. Si Hamani duhet të kenë qenë shumë, shumë armiq të Judejve. Ata duhet t'i kenë sulmuar Judejtë egërsisht, sepse 75,000 prej tyre humbën jetën në luftë. Judejtë nuk u morën atyre tokën dhe shtëpitë. Ata nuk ishin të mbushur me urrejtje sikundër ishin armiqtë e tyre.

Në fund të ditës, dita e trembëdhjetë e muajit dymbëdhjetë, asnjë nga Judejtë nuk mungonte! Perëndia, natyrisht kishte qenë me popullin e Tij, duke u kujdesur për ta në çdo çast.

Nëse je fëmijë i Perëndisë, Ai është i Vetmi që kujdeset për ty. Shpesh Satani do të përpiqet t'ju pengojë që të jetoni për të kënaqur Zotin Jezus. Mund të ketë rast që të ndjehesh dështak, sepse nuk i je bindur Perëndisë. Në gjithë këto momente, Perëndia të do dhe kujdeset për ty. Nëse ti i beson Zotit Jezus, Ai do të kujdeset për ty deri sa të të sjellë në Qiell. Atje, ti do të njohësh dashurinë e Tij të mrekullueshme për jetë të jetëve. Prandaj, mos harroni këto fjalë, 'Ai kujdeset për ty.' Ai gjithmonë kujdeset për njerëzit e Tij.

Natyrisht, Judejtë ishin të ngazëllyer nga kjo fitore e madhe. Të nesërmen, ditën e

katërbëdhjetë të muajit të dymbëdhjetë, ata pushuan dhe e kthen atë në ditë feste e gëzimi. Në gjithë perandorinë, në fshatra e qytete, ajo ishte ditë gëzimi. Të nesërmen, në Shushan dolën Judejtë të festonin.

### **Piktura 6 – 3**

Në pallat, Mardokey vinte pas mbretit për nga nderimet. Ai dhe Esteri i shkruan letra Judejve që të festonin çdo vit në ditën e katërbëdhjetë e të pesëmbëdhjetë të muajit të dymbëdhjetë.

### **Piktura 6 – 5**

Ata s'duhet të harronin si brengosja e tyre u kthye në gëzim. Edhe sot, Judejtë i festojnë këto dy ditë, të quajtura Purim, që u kujtojnë atyre si Perëndia u kujdes për popullin e Tij.

Sigurisht, nëse ti e njeh Zotin Jezus, ti duhet të thuash, 'Unë jam i gëzuar që jam njëri nga njerëzit e Perëndisë.' Falenderojë atë për dashurinë e Tij të madhe, një dashuri për të cilën ti je i sigurt. Besojeni Atë edhe kur problemet janë të vështira, sepse 'Ai kujdeset për ju.'

### **Piktura 6 – 7**

Mund të ndodhë që ti e di se nuk je njëri nga njerëzit e Perëndisë, por ti dëshiron të bëhesh. A dëshiron të largohesh nga paudhësitë në jetën tënde? Duke besuar se Jezus Krishti vdiq i kryqëzuar për mëkatet e tua, a do t'i besosh Atij të largojë mëkatet e të të bëjë njërin prej njerëzve të Tij? Atëherë, ti do të njohësh dashurinë dhe kujdesin e Tij në jetën tënde. Mos harroni vargun Biblik, 'Sepse Perëndia e deshi aq botën, sa dha Birin e tij të vetëmlindurin, që, kushdo që beson në të, të mos humbasë.' (Gjoni 3:16) Nëse Zoti po i flet zemrës tënde sot, besoji Zotit Jezus. Atëherë do të kesh jetë të përjetshme dhe s'do të vdesësh kurrë.